

藝
風
堂
文
集

藝風堂文集卷七

韻補跋

景宋鈔本吳才老韻補五卷每半葉有謝子芳刊餘無也景寫尙精無各家收藏圖記荃孫取連筠篴刻本校之刻本張氏穆緣起云刻入叢書時何子貞借各家刻本寫本及大興劉侍御藏汲古閣景宋鈔本譌謬踵似不足據乃取才老引用之書精意校對云云此本譌脫更甚大約刻本模糊鈔胥以意爲之誠有如張氏所云者然徐釅序中考古銘箴誦謠謠諺之類刻本謠字不重按謠字當是繇字觀書目舉左邱明傳易林可證景作謠非刻本刪之亦非又三年

藏歸吳而才老死久矣刻本落藏歸吳三字書目史記注秦
刻石辭下刻本落龜策傳自序皆韻七字又落漢書一條注
後漢班固所作漢文宣自序皆韻在史記行下想原本如是
傳鈔奪去耳

注引漢書甚多

道藏歌詩注當是晉魏人作刻本改魏

晉按此言晉魏或兼元魏言之不必定屬黃初也又十八尤
馗字注引王粲詩女士滿莊馗與文選合刻本改士女二十
五添與廣韻合刻本作沾按廣韻注或作沾似不必改定沾
字九御途字注荀卿成相篇已无尤人我獨自美豈獨無故
刻本刪下獨字按楊倞注或曰下無獨字盧氏文昭校云無
獨字則與全篇句法合是唐本本有獨字才老所見亦然不
必從而刪之也刻本閒有訛字均爲拈出引書與今本異者

苟可兩通悉錄於眉端又注引素問韓子琴操書目未出恐
尙有訛奪也

入語蚌字注國策今日不雨明日不雨必有死蚌讀蚌叶
雨按輔行記引作今日不雨明日不雨必有蚌脯脯雨本
韻宋時已作死蚌而才老又誤引也

聖武親征錄跋

右皇元聖武親征錄無卷數光澤何先生願船取舊鈔本校
以金元二史元祕史及金元人傳記文集攷形訂聲經年緝
月削其重複更其舛亂補其奪字刪其衍文張丈石州推其
廓清之功比於武事誠非虛語然亦尙有未盡者如是時別
里古台那顏掌上乞列思事親搖上馬何云搖字疑誤荃孫

校搖疑是控字大太子朮赤二太子察合台三太子窩台太宗也荃孫校太宗也三字是注誤入正文詔史天倪南征取平州木華黎遣大進道攻廣寧府降之張文校云本紀作賜進道荃孫校大進道爲史進道之訛賜進道則音近而誤進道秉直之弟天倪之從父從木華黎攻廣寧府均見進道神道碑七月上遣唐慶使金保降荃孫校保降是催降之誤觀下文遣人入城催降可見乙亥金右副元帥七斤以通州降木華黎攻北京金元帥寅花磨等以城降金御史中丞李英帥師援中都戰於霸州敗之三事皆與下文復荃孫校下文卽云金主以檢點慶壽元帥李英運糧分道還救中都齎糧人三斗英自負以勵眾慶壽至涿州旋風寨李英至霸州青

戈皆爲我軍所獲與金李英傳元本紀合又云時金通州元帥七斤率眾降惟帳復張鑊柄眾哥也思元帥據守信安何校云未詳荃孫按帳復是張甫之譌張鑊柄是張進之譌眾哥也思是眾家奴之譌金九公傳張甫張進眾家奴據守信安不下正在是時下又云金元帥那答忽監軍斜烈以北京來降何校云北京疑有誤荃孫按寅花曆元太祖紀作寅古答論虎卽那答忽也願船不知三句爲衍文而強爲之說所以愈疑愈誤也

會稽三賦跋

會稽三賦三卷宋王十朋撰史鑄注道光丁酉杜春生景宋本重梓取以校湖海樓陳氏本祇得譌字數處陳本爲汪蘇

潭吏部校亦甚精核惟風俗賦菱歌注云舊注菱歌調易急
校文選本是采菱調易急景宋本畱墨臺半行陳本刊去校
語氣未畢下疑有辨證之語未刻者宜仍舊觀不當削之也
愚齋注此賦引用書近多不存如禽山引許慎淮南原道注
云塗山在九江當塗縣章亥引慎地形訓注云大章暨亥善
行人皆禹臣也二條槩桑引太康地記云諸暨境土諸山出
第一槩桑文采如博棊方正駢次有如畫作可爲展鰐上品
者一兩至數十萬一條爲孫畢輯本所遺賀知章龍瑞圖經
三條亦出道藏李宗諤重修本之外餘周易略例顧伯邨詩
傳類證蜀王本紀吳錄周處風土記賀循會稽記孔_融會稽
記孔靈符會稽記夏侯增先地志盧驤西征記會稽典錄襄

陽舊記廣州記武陵記興地志南越志地理圖十道志晉

安海物異名記圖經

越州圖經

濠梁圖經名山志復齋謾錄隋唐

嘉話崔希裕纂古遜齋閒覽殷芸小說談助遁甲開山圖僧

史續仙傳石氏宗譜洪興祖補注楚辭皇宋百家詩選會稽

覽古集蔡寬夫詩話各種卽晁陳書目亦多缺略碎璧零璣

皆堪寶貴鑄自序云事涉於隱者則從詳備目熟乎見者則

從闕略實足爲注書之法不僅取材之富也

秦邊紀略跋

此書五冊不分卷不著撰人名氏 四庫存目作四卷以首

卷河州條注內有康熙十四年二十二年等事定爲康熙時

人所作荃孫按章實齋撰劉湘燿傳云（監）都梁懷葛著秦邊

紀略有書無圖湘燧偶得圖以校其書纖悉脗合疑卽梁圖而與顧氏方輿紀要頗相齟齬湘燧合訂爲秦邊紀略異同攷六卷始知此書爲梁著又按劉繼莊廣陽雜記云梁質人畱心邊事已久遼人王定山燕贊爲河西靖逆侯張勇中軍

與質人相與甚深因之徧歷河西地故得悉其山川險要部

落游牧暨其強弱多寡離合之情著爲一書曰西陲今略徐星

伯西域水道記引之歷六年之久寒暑無閒其書始成書凡五冊冊各

百餘紙繼莊爲刪定存四百餘葉改定今名與此書適合存

目又載懷葛堂文集十四卷梁份撰份字質人南豐人嘗學

於（監）都魏禧章實齋以爲（監）都梁懷葛近吳竹莊方伯坤修

刊於懷（監）以爲乾隆時人王文泉孝廉文瀾刊於定州以爲

蠡縣李培撰皆誤是本前有石匏二字小長印朱文復有張開福印四字方印白文石匏開福字浙江海鹽明經芑堂先生之子曾就延榆綬道劉燕庭觀察之聘出入秦邊此書蓋行篋中物將以攷核西郵地理者

蜀典跋

武威張氏

瀚

蜀典分十一類援據浩博是其所長其中如堪

輿類蜀境一條引陸機傳蜀土與秦同城一條引博物志俱行文之辭不足爲典要蜀城一條引王右軍帖不知右軍書爲唐人僞造更不足據蜀井一條云廣陵蜀岡上有蜀井言水與西蜀相通此與荆溪之蜀山同例當入揚州方志不宜載之於蜀宦蹟類开度一條書錄解題文獻通考均作井度

廣韻井字下云又姓姜子牙之後春秋時有井伯正字通作
开者字誤正字通本俗書不足稱也著作類健爲舍人爾雅
注輯如左隱十二傳正義引圉邊垂也釋文渝變也引作濡
詩載芟正義引繹繹穀皆生之貌論語述而正義引無舟而
渡水曰徒涉御覽引樵大者如鵝子聲合黃鐘小者如雞子
聲合大簇夾鐘荆楚歲時記引杏花如茶可耕白沙史記司
馬相如傳注引楓爲樹厚葉弱莖大風則鳴故曰楓詩螽斯
正義引蚣蝮今所謂春黎也皆失輯蜀才易輯如集解訟卦
剛來而得中也引此本遯卦按二進居三三降居二是剛來
而得中也隨彖下引此本否卦剛自上來居易柔自初而生
上則內動而外說是動而說隨也相隨而大亨无咎得於時

也得時則天下隨之矣故隨之時義大矣哉釋文引井累其
瓶辯吉凶者存乎辭注辯別也知崇體卑象也者像也均失
輯譙周法訓御覽四百六引譙子齊交篇文雖引而脫篇目
輓歌條複出初學記十七引好學以崇志故得廣業力行而
卑體故能崇德是以君子居謙而宏道然後德能象天地意
林卷六引公人好人之公私人好人之私念己之短好人之
長近仁也有財不濟交非有財也有位不舉能非有位也相
憎者能生無辜之毀相愛者能飾無益之譽君子好聞過而
無過小人惡聞過而有過五條均失輯蜀石經毛詩一卷外
今尚存舊撮左氏傳第二十三一卷穀梁儀禮各十數行又
張氏所未見姓氏類用氏風俗通云云元和姓纂引之在今

本風俗通之外卽毛詩孟庸庸與閭通左傳作閭職史記作庸職是也名士錄又有用羽之張氏言亦未明晰开度見宦蹟類又見姓氏類卷十二并氏十三葉一見四十葉一見均爲複出引用古書半皆亡佚不著所采之處亦屬不合然張氏素稱博學此書搜采繁富亦談蜀者之所不廢也

大唐郊祀錄跋

大唐郊祀錄十卷唐王涇撰 四庫未收藏書家各有傳鈔本譌奪最甚此從烏程汪謝城日楨校正本過錄譌者訂奪

者補千年就祕之帙煥然一新雖未能毫髮無憾亦可觀大

概矣眉閒錄長興臧眉卿

壽恭

南匯張嘯山

文虎

校語金山

錢氏指海十八集卽刻汪本而以臧本校之今取對勘仍有

出入爰錄副藏雲自在堪附錄一卷汪君所輯掇采甚富荃
孫又檢唐會要十八載元和十四年二月太常丞王涇上疏
請去太廟朔望上食又中書舍人武儒衡議曰今王涇所引
太廟與陵寢同日時設祭以爲越禮又王涇狀以太廟設祭
別加常饌以爲褻味此三條附錄失引汪君未核唐會要故
也補撰樂章有大閩國太常博士張連汪君據以爲王閩時
所竄亂之證而惜張連姓名他無可考遂不知補撰在閩何
時今按太廟迎神第二奏樂章注云元闕臣陳致雍補致雍
南唐太常博士見陸游書后妃傳馬令書潘佑傳吳任臣十
國春秋有致雍傳云陳致雍莆田人博洽善文辭憲章典故
仕閩景宗爲太常卿入南唐以通禮及第景宗閩王延羲廟

號致雍與張連同官其補撰樂章似當在永隆時然考五代
會要唐天成三年封福建節度使王鈞爲閩王更名鱗五代
史唐長興三年自稱帝國號大閩改元龍啟然猶稱藩於朝
廷諡曰惠宗子昶嗣晉封閩王諡曰康宗審知少子曦嗣晉
封閩國王諡曰景宗是曦卽位之時已屬晉天福四年拜受
晉封已際兩代決無反祠唐帝之理意者惠宗之初大號初
膺制禮作樂外示藩屬於中朝內以儀型夫臣下連與致雍
同官治禮樂章之補當在是時而致雍至景宗之朝猶爲太
常卿耳致雍事又見江南餘載今尙存曲臺奏議十卷

遂初堂書目跋

遂初堂書目一卷宋尤袤撰袤字延之無錫人紹興十八年

進士官至禮部尙書諡文簡事蹟具宋史本傳延之富於書籍遂初堂所藏陳振孫推爲近世之冠此目無撰人無卷數毛开序魏了翁陸友仁二跋與四庫本同一書兼載數本開近人目錄兼載各本一派複見之書提要舉大曆浙東聯句一入別集一入總集今攷其中如焦氏易林一入周易一入術數汲冢周書一入尙書一入春秋天下大定錄一入雜史一入僞史皇祐平蠻記一入本朝故事一入地理慶曆軍錄一入本朝故事一入兵書隋李文本中興書一入儒家一入雜家瀨鄉記一入地理一入道家熙寧番官陳院編敕一入職官一入刑法文場盛事一入故事一入小說石藥爾雅一入醫書一入道家于公異記集令狐楚表奏事一入別集

一入宣奏文苑英華一入類書一入總集花間集一入總集
一入樂曲郊祀錄儀注類兩見崔顥集伊川先生集別集類
兩見王文公送伴錄王介甫送伴錄一舉其字一舉其諡一
入雜史一入本朝故事共十八條今皆注明重出而原文不
刪李紳追昔游編見別集類又有李公垂集不知是一是二
均在可疑宋人目錄畱於今者只晁氏讀書志與此目尙是
流傳舊本殊可貴也延之嘗取孫綽遂初賦以自號光宗書
扁賜之故以遂初名堂云

得月樓書目跋

右得月樓書目一卷得月樓爲明李鶚卿如一藏書之所如
一爲李詡戒庵之孫藏書最富與文文起錢受之相友善世

所謂赤岸李氏者也其孫成之跋戒庵漫筆云乙丙易代之際土賊四起書倉燬燼獨其目幸存於家李將俟刻之聊志先大夫彙集之苦心云蔡澍江陰志列傳云如一倣宋晁氏目錄發凡起例自爲詮次是如一本有書目而今亦不傳此目止百九十餘種雖云摘錄然世閒已佚之書如李廉春秋諸傳會通廿四卷陳伯宣史記注八十七卷劉攽東漢刊誤一卷汪應辰唐書列傳辨證二十卷呂祖謙新唐書略三十卷李德裕大和辨謗略三卷歐陽靖聖宋掇遺一卷蔣之奇魏公逸史二十卷倪思正齋台諫論二卷中興集議名臣言行錄三十卷呂東萊觀史類編五卷胡恢南唐書十卷劉恕十國紀年四十二卷朱敏求河南志二十卷周滄臨安志

十五卷趙抃成都古今記三十卷楊侃職林二十卷張著翰
林盛事一卷白太素續通典二百卷万俟卨紹興貢舉攷法
五十卷丁謂景德會計錄六卷顧烜錢譜十卷陶岳貨錢錄
一卷董道續錢譜十卷陳絳山堂遺集十卷續八卷文苑摘
粹十卷共二十七種王文簡居易錄云陸雲士令江陰云有
胡恢南唐書今見此目方知陸所云者卽李氏所藏而書久
佚荃孫从汪卽亭前輩所假得爲黃薨圃舊藏與述古堂傳
是樓朱元本目各爲一帙喜爲錄存并錄副贈金君澐生澐
生卽粹入栗香室叢書特苦其編次無法又複出十國紀年
文苑纂要辨證兩種辛卯自京旋里又從赤岸故家覓得鈔
本一帙較爲完善復爲粹行江陰藏書家前明推朱君子儋

李君如一今子儋僅有存餘堂詩話及以愛妄易宋本漢書一事又不如如一尙有此目存也

朝鮮金石目攷覽跋

嘉道閒朝鮮士人之談金石者曰趙寅永雲石曰金正喜秋史諸城劉燕庭方伯均與之善因得其國之拓本最多釋其文字攷其原委爲海東金石苑八卷又撮其目爲海東金石存放一卷其無存者列爲待訪目至精至確此金石目攷覽二卷爲朝鮮金秉善所撰碑較多於燕庭所得然存佚不分惟存者攷其額若干字足以取信非稗販而爲之者今取燕庭兩書校之梁貞明白日棲雲塔碑脫碑側晉天福忠湛塔碑脫碑陰元普濟尊者浮屠碑脫元宣光六年元順帝子廟號年號

昭宗宋脫圓覺禪師碑元脫①覺禪師碑大藏移安碑慶平寺
石幢攷證脫王融崔惟清韓文俊李之茂李②孝李奎報梁
載權漢功諸條非特金君未見鮑子年亦未見也荃孫又藏
葉東卿高麗碑全文內有宋大覺國師墓室及碑銘安立事
蹟記圓光徧③法禪師碑元元貞普覺大師塔碑皇慶權
文清公墓志明碑尙夥不足記金石隨時隱見如此書者其
搜訪亦不爲無功云

汪應辰石林燕語辨跋

宋葉夢得撰石林燕語十卷所紀朝典國故官制科目當時
已重其書閒有記憶失真處同時有汪應辰作辨字文紹奕
作攷異以糾之而各自爲書燕語世傳商氏稗海本脫譌踳

駁不堪卒讀仁和胡君珽鈔得 文瀾閣附攷異本又得何

學士

焯

沈廣文

欽韓

合校正德楊氏本再參以

四庫攷證

舊聞證誤凡前賢論說之足資攷核者悉爲甄錄以活字板印行可謂燕語最善之本惟攷異經館臣錄附原書而甚惜汪辨僅存其目二百二條於大典悟字韻中辨則寥寥數條無從掇拾書錄解題亦稱未見儒學警悟閒引數條大典亦未全采是汪辨於宋末傳本卽希而儒學警悟於明初亦非易觀也荃孫初得胡氏集辨本又得明楊氏本頗思爲之刊行旋聞廠賈自山西歸有明鈔儒學警悟全部急往詢之已爲宗室伯希祭酒所得幸伯希假我錄副絲紙藍格古香盎然方知儒學警悟爲太學俞鼎孫同上舍元經編汪應辰石

林燕語辨十卷程大昌演繁露六卷馬永真嬾真子六卷陳善捫蝨新話二十卷四種共四十二卷署曰初編每卷題儒學警悟第一第二宋人叢刻與百川學海同時爲彙刻書目所不載亦可謂驚人祕笈矣然演繁露三書尙有他刻而汪辨則已成孤本鈔白頗有訛脫爰取楊胡二本校定正文補脫字有兩通者不妨存異商本楊本各不同此書字句往往與楊本同辨語共二百條照原書分卷

葉據大典作二百二條衍下二字攷

異得五十六條而與辨同者四十六條縱所據略同而字句仍不少異何耶至說郛引二條舊聞證誤五條容齋五筆一條葉君廷琯引一條而無書名各條均見此書似亦無所佚脫葉胡二君校燕語時深惜此書久佚孰知全書十卷尙在

天壤閒耶

捫蝨新話跋

捫蝨新話十五卷宋陳善撰 四庫列之存目昭文毛氏曾
刊入津逮祕書按讀書敏求記云捫蝨吾家所藏有二一是
宋鈔本不分卷帙末有羅源陳善子兼跋云丙寅歲余由海
道將抵行在所遇颶風船壞盡失平日所業文字旣而於知
友閒得所著捫蝨新話因加刊削得一百則時紹興己巳正
月二十一日也此本墨敝紙淪古香醃穢或者疑爲子兼稿
草一是影摹宋刻本標題云朝溪先生捫蝨新話釐爲十五
卷不列子兼名氏并脫跋語二者未知孰爲定本姑兩存之
以備參攷可耳此舊鈔本云新刊朝溪先生捫蝨新話無跋

語亦無名字與敏求記所云影摹宋刻本合每條各著前話後話下注數目豈本作前話後話爲好事者摘以歸類故題云新話與惟訛字較多是鈔而未校者荃孫舊藏從明人刻本景寫者并成四卷刪除門類實爲無理竄亂然較舊鈔本只脫一條訛字亦少

黃蘗圃所見鈔本卽述古舊藏只一百則不分類無子目與十五卷本一百九十三則大不相同恐是前話後話之一種

意林跋

意林今止五卷高似孫子略中載有全目較今本多蔣濟萬機論以下三十七家洪邁容齋續筆卷二臚列意林內不傳

之書三十三家今本無者十七家乾隆中海_當周氏廣業輯
意林逸文六條又據續筆所稱各家輯之爲意林附編迨文
選樓得宋本多第六卷嘉興李氏遇孫鈔之海_當蔣氏刊入
斟補隅錄海內始得見意林完本今意林卷二二家原有目
無文卷六四十一家有目無文十三家子略原目所列洪氏
所稱照曠閣據說邠所補周氏所采大都在是惟以子略目
核之新序今在第三卷宋本複出譙子五教子略在法論下
注並引禮記語今奪周髀次相鶴經之下夢書次汜勝之書
下相貝經作貝書次夢書下九章算術次萬畢術下博物志
次算術下筆墨法居末均不同子略原目以時代爲序略分
家數似是意林原文惟奪道德經荀子杜夷幽求子干寶干

子華譚新論孫綽孫子六家係傳寫之訛然續筆有干子而無幽求子新論孫子核之崇文總目均屬不傳之書豈容齋所見本卽佚此三種與牟子見子略目次正部下亦見續筆本草經小注云華陀弟子吳普六卷見子略目次神農本草經下今奪相鶴經黃長睿東觀餘論云原書久佚惟馬總意林及李善文選注鈔出相貝經楊升庵亦云原書已佚此特意林所引今二家有目無文施元之注蘇東坡次韻孔毅父久旱詩引意林袁準正書一條天中記陂類引意林一條今本亦無之大約宋時已無全帙然諸書間有輯本頗有得數十百條獨遺此一二條者亦可見宋本之足貴已

乖崖先生文集跋

朱張忠定公集向無刻本獨山莫大令祥芝得吳中張青芝
仿宋本手鈔乖崖先生文集如式重雕復假孫淵如先生舊
藏明人影宋寫葉十六行行十六字本校補洵足嘉惠藝林
表彰前誥矣荃孫復取舊藏馬寒中鈔本校之無甚大異惟
新刻益州重修公署記竹樹花卉所至畢臻下四百餘字依
十六行本移入昇州重修轉運司公署記中互爲刪補而讀
其文有不可解者馬本益州重修公署記竹樹花卉所至畢
臻下接自韋南康驕悍之餘孟先主儻惇之後其安其適習
以成風若今之所營實敵以合道輕浮潛厚凶忤寢仁循吏
所能允克皆踐苟采訪之吏亟以狀聞而疇庸之恩遄當不
需參三事之庶政翊大君之鴻猷休泰之辰恢闡益盛乃中

外之同詞也

下用

接周翰柴愚

云

昇州重修轉運司公署

記記中不得擅爲異法也誠以命令稟於天子其昭著能事厥惟善良苟郡縣不德奸豪任情蠹弊因仍刑罰不正民有不得平者征斂違度巡護不謹毒有流於下者咸得致詰下接以聞或高才沈於下寮治聲被於四遠鄉黨之孝悌巖谷之貞純悉係明揚用稱中旨加之辯惑煥然易從如此則上無曠官下無冤人馴良適意凶邪喪朋欲民不謳歌於路時不頌雍熙者未之有也記末與夫循默養名怙下接權自大者不同日而議也考昇州爲今之江寧府興記中云江南轉運司合韋南康二語麤入不倫二十六行本以聞上空一格自大句去一權字添裁正與三字是後人以意妄改上云與

夫循默養名怙習以成風下云與自大者不同日而議不但
語句相複而意亦未全也兩記互易則文意均足當依馬本
改正

摘文堂集跋

摘文堂集十五卷宋慕容彥逢撰彥逢字叔遇宜興人元祐
三年進士復中詞科崇寧元年除祕書省校書郎歷官刑部
尚書卒謚文友宋史無傳仕履僅見集後附錄墓志宋藝文
志有此書而晁陳書目不載想已久佚按此集宋時亦罕見故宋文鑑不收未必
鄙其人而損之今館臣從大典搜輯編成十五卷幾及全書之半亦
足以傳叔遇惟制誥類中有降授奉議郎趙高可差知徐州
制按宋史元豐五年知淮陽軍奉議郎趙高知徐州前於叔

過當制約二十年又有楊愿除中書舍人誥宋史紹興十二年九月始遺楊愿賀金使正旦距叔遇之卒亦二十年大約以他人文羣入此編纂之誤也內端明殿學士朝散大夫曾孝寬可差知鄆州降授奉議郎趙高可差知徐州兩制合爲一題又故左藏庫使趙從義可贈皇城使惠州刺史充本州團練使制贈是身沒之榮充是任官之命合爲一題語氣不貫觀制語首云設館以待四方之臣置使董事頗似四方館使制又不相合其爲誤合無疑又回謝貢士樂僊樂傳啟後脫一題宗室故懷州防禦使河內侯墓志銘中閒有脫文此傳錄之誤也叔遇諡文友諡議曰德美才修曰文能善兄弟曰友其孫綸鏤版時目以文友公摘文堂集其爲文友無疑

廣本提要誤作文定而宜興新志因之當据此以訂其誤至文辭雅麗讀者當自得之

鴻慶居士集跋

鴻慶居士集四十二卷宋孫覲撰覲字仲益晉陵人大觀三年進士繼舉宏詞第一歷官翰林學士提舉鴻慶宮故其文稱鴻慶居士集生於元祐辛酉卒於乾道己丑年八十九仲益在當時爲眾人所譏屢起屢蹶宋史不爲立傳岳珂程史趙與皆實退錄均痛詆之四庫雖收其書提要亦極貶斥其人賢否久已論定無庸置辨惟仲益生值國故更事徽欽高孝四朝爲文章容與詳贍淹賅眾體於皆廬陵南豐眉山諸老相繼徂謝仲益趾其後最號作家今流傳有二本一

卽此本慶元中其子介宗所編周益公序 四庫以此著錄
一孫尙書大全集七十卷首冠宋字儀願堂題跋定爲宋以
後人編而是集所無者書四首啟三十九首詩八十五首表
二十一首狀三首外制兩首記二首序三首賀啟三首帖七
百六十二首跋語二首頌一首題跋二十四首墓志三首挽
詞四首青詞一首疏九首篇數溢出三分之一然周序已言
先有閩蜀兩刻中間雜以翟忠惠文然難於決擇今別爲補
遺附刻於後而此本賀張參政啟卷十七卷二十兩收編次
亦未盡善自宋至今輾轉傳鈔訛脫不可勝舉前在京師假
得臨清徐梧生戶部影宋寫本係借書園舊藏行款均自宋
本出而訛脫亦甚卷三十二缺一葉借錢塘丁氏本補足卷

三十四缺一葉從大全集補足明嘉靖刻本止十四卷反改周序四十二卷爲十四則明人陋習不足據也

孫尚書大全集跋

宋南蘭陵孫尚書大全集七十卷不知何人所輯卷一至卷四書卷五至十一啟卷十二至二十詩卷二十一二十二表卷二十三二十四狀卷二十五至二十七外制卷二十八劄子卷二十九至三十二記卷三十三三十四序卷三十五三十六賀啟卷三十七至五十帖卷五十一行狀卷五十二銘贊卷五十三文語頌傳卷五十四題跋卷五十五墓表卷五十六至六十七墓銘卷六十八挽詞卷六十九青詞卷七十祭文疏文較鴻慶居士集本多出書四首啟三十九首詩八

平五首表三十一首狀三首外制二首記二首序三首賀啟
三首帖七百六十二首跋語二首頌一首題跋二十四首墓
志三首挽詞四首青詞一首疏九首共九百六十八首第所
收既博牴牾亦所不免如卷三與耿伯順書與卷四十一與
耿侍郎帖同卷五十五碩人孫氏墓表與卷六十五碩人孫
氏墓志銘同一有銘一無銘卷四十四與婆守李德升尚書
帖與卷四十八與楊元光宮教帖同只後幅多四語耳卷二
十三申雪第二狀有錄無文上丞相第二劄子後幅錯入求
時宰解郡乞祠劄子卷二十四回平江府蔣待制狀應編入
十卷卷四十三與廣西少漕趙隱帖其一未完周益公序鴻
慶集言中雜以翟忠惠文更無從辨別矣明文淵閣書目始

著於錄 四庫止收鴻慶居士集四十二卷然內簡尺牘編注 提要云觀所撰自三十七卷至五十卷皆書帖卽據大全集卷第若鴻慶集只四十二卷也又云第七卷與常守徐計議第五帖注引觀集常州資聖禪院興造記在集本三十一卷亦指大全集本鴻慶集此記在二十二卷則館臣之誤也

內簡尺牘跋

內簡尺牘十卷宋孫觀撰按仲益生平文字其子介宗所編者爲鴻慶居士集四十二卷後人又編爲孫尚書大全集七十卷此尺牘十卷四百十八篇門人李祖堯編次而自爲之注鴻慶集未載尺牘大全集載尺牘八百三十四篇與此同

者僅有二十六篇同時掇拾各有短長正宜互存以成全璧
不特文筆清雋爲宋中葉大家而當時朋舊亦藉可考見梗
概矣此書有宋刻本分十卷標題曰李學士新注孫尙書內
簡尺牘方牌子云蔡氏家塾校正銜名首行左朝奉郎充龍
圖閣待制孫覲仲益撰次行門人李祖堯編注無序目有元
天曆庚午刻本分十六卷宋慶元三祀梅山蔡建侯行甫序
有成化辛丑仲益十一世孫蜀撫仁刻本標題云孫尙書內
簡尺牘錢溥序有嘉靖丁巳建陽守顧名德刻本自爲跋有
萬曆庚辰淮陽學政李時成刻本姚江葉逢春序三刻皆十
卷 國朝乾隆丁卯無錫蔡龍孫蔡焯病舊注簡牘廣搜羣
籍爲之增訂補苴漏頗有功於是書今刊附鴻慶集之後

仲益之文字幾幾全備矣蔡序今本所無從元刻本錄出以冠其首

丹陽集跋

丹陽集二十四卷宋葛勝仲撰勝仲字魯卿江陰人紹聖四年進士官至華文閣待制知湖州謚文康事蹟具宋史文苑傳其文集八十卷外集二十卷久佚館臣從永樂大典輯出編詩文爲二十四卷

絳雲樓書目有丹陽集三十卷雖與史傳不合然自是舊本未知尙在天壤間

否江陰葛氏世籍廣陵唐天祐中避孫楊連兵之禍渡江南徙宋代門祚鼎盛五世登科第三世擘詞命宋史有傳三人附見十人最爲江陰望族魯卿再守湖州有全城功遂卜居吳興汎金溪上集中有汎金溪宅上梁文其子立方韻語陽

秋序云歸休吳興汎金溪上是舊家江陰徙居吳興可見者
如此葛氏以葛洪著望稱丹陽魯卿自署丹陽廼宋人之舊
習集亦署曰丹陽集是晉時之丹陽郡非宋時之丹陽縣也
自陳振孫書錄解題誤以爲丹陽人而宋史因之遂以魯卿
爲舊居丹陽徙居吳興似與江陰無涉者因厯考丹陽歸愚
兩集韻語陽秋均無徙居丹陽之文京口耆舊傳嘉定至順
兩鎮江志亦不載葛氏父子鎮江志如陳升之蘇頌曾布之
寓居者均載之豈有獨遺葛氏
父子韻語陽秋云余曾祖通議楊寔榜登科未四十致政享
年入十七居江陰軍青陽之上湖自號草堂逸老又云先人
文康公罷官南陽適當兵擾復還舊業奉伯父工部居焉別
建二老堂於宅南眷望由里諸山皆在目考由里山離江陰

城九里距青陽亦在指顧孫鴻慶爲作序文有曰覲與公同
州里亦可爲魯卿居江陰之證若爲丹陽人則屬鎮江府不
得謂同州里丹陽集二十一有里中無居寓丹陽縣詩五六
聯云退食井腴如就國原注某見封丹陽郡遙尋祖系似還
鄉原注葛稚川丹陽人觀此更可見非丹陽人矣至近代志
志又据宋史鈔入不足據也此集藏書家罕見昔年嚴肆會
出孔莊谷鈔本爲汪郎亭前輩購去今從文淵閣錄副取
以刊行訛錯滿紙校讐不易丹陽詞一卷四庫別收汲古
毛氏刻入六十種詞今取集中詩餘一卷互校有汲古無而
本集有者三首汲古有而本集無者十八首字句亦有短長
乃重爲校定而以汲古所有之詞附刊於末鴻慶集出有序

文一首 閣本未錄今仍冠於集首以符其舊七言古詩有
次韻鄭維心游西余山詩係七言律兩首爲改附七言律詩
之後

友林乙稿跋

友林乙稿四明史彌_監撰彌_監字安卿一字清叔史忠惠王
浩弟源之子錢辛楣先生見史氏譜知彌_監以宗女澤仕至
武功大夫太子右春坊閣門宣贊舍人除忠州團練使知泰
州兼淮安提舉趙希弁讀書附志安卿嘉定中以國子舍生
之望涖春坊事帶閣門宣贊舍人知邵陽此集前有域序失
其姓按域字中卿見文獻通攷集中有謝鄭中卿惠螭蛭詩
卽此人宋詩紀事域字中卿號松窗三山人_淳熙十一年進

士慶元中曾隨張貴謨使金著燕谷剽聞二卷官幹辦行在
諸軍糧料院并收玉藥花一詩山丹一詩出全芳備祖黃楊
峇一詩出延平府志近見寶慶府志又得法相岩詩法相具
諸相疊方無定方突兀虎豹立嵌空蛟龍藏入地轉輪遠透
天圓寶光何人鑿混沌棄擲官道傍嘉定癸酉至日松窗鄭
域中卿并知其爲武岡軍判官則與序所云太師文惠魏王
帥閩以庠序諸生最沐稱賞後四十年墮影湘南乃得親炙
春坊領閭公之幕下相合是彌益知邵陽時而域爲武岡州
判官正所屬也姬侍類偶有中卿序詞綜收念奴嬌一闕惟
希弁云友林詩稿二卷有黃景說曾豐序此祇乙稿無黃曾
兩序疑尙有甲稿今失其傳黃薏圃百宋一廬藏有宋槧劫

後客滬猶及見之此吳中翻刻儼然中郎虎賁詩止百七十
首如雲蠻著色四時畫石瀨有聲千古詩一毛不拔管城子
冷眼相看石丈人置之浩翁集中幾無以辨有彝尊私印竹
垞玉樹山房當湖小重山館胡箋江珍藏諸印

北郭集跋

吾鄉如心許先生得詩名於元明閒曰北郭集海四庫著錄
而書亦罕見昔年從杭州丁脩甫孝廉鈔得表兄金漣生同
轉錄副以去并從秀野草堂元詩選錄出廿二首別爲補遺
三卷於縣志采蘇伯衡序又采孫作序列入栗香室叢書海
內始有傳本己亥新正至滬得同里趙敬夫先生曦明手鈔
本跋云北郭集原本四百四十五首國變無傳迺於張允敬

江陰文獻錄得二百五十六首又於許氏家譜得一百五十
首去其重複分體編錄得五古廿九首七古廿八首五律七
十二首七律一百廿四首五言長律三首七言長律四首五
絕六首六絕四首七絕二十三首共二百九十三首分爲六
卷而卷中古近體仍是雜編是敬夫雖定目錄尙未照目另
寫此書乃稿本也與四庫本相校序次盡同而多五十首
是四庫照此輯本收入元詩選亦不出乎此均未見原書
也卷首有張端金文徵林右三序均作於洪武朝

明王百穀詩文手稿跋

右明王百穀詩文二冊邵陽魏默深所藏今歸吾友蒯禮卿
檢討詩文雜次塗抹鉤勒字跡亦疏雋有致蓋手稿也後有

仁和龔定庵先生跋因首冊之首題云南有堂集壬寅元日
起次冊之尾題云除夕正值亡兒之戚止定爲壬寅一歲之
詩按百穀刻本詩文各署集名曰晉陵集二卷金昌集四卷
燕市集二卷青雀集二卷定越志二卷竹箭編二卷梅花什
一卷明月編二卷雨航紀一卷清茗集二卷越吟二卷荆溪
疏二卷延令纂二卷采眞篇二卷法因集四卷丹青志一卷
虎苑二卷吳社編一卷生壙志一卷苦言一卷謀野集八卷
共四十六卷獨無南有堂集因借錄副通校一過方知後冊
乃辛丑冬日所作其子歿於辛丑之冬前冊乃壬寅春日所
作故第一首元日詩云舐犢空憐病裹身穀日詩又云失雛
憐老鶴舐犢悼亡麟東郭人空老西河痛莫伸又有亡兒五

七禮佛拜懺文並非一年之事賈人得零稿數冊強合爲一以充完善定庵先生亦未細閱也考次冊第二首恭讀立皇太子詔志喜校明史辛丑爲萬曆二十九年立皇長子常洛爲太子在十月己卯是次冊應改爲首冊從辛丑十月起首冊末數葉有祭陳大司馬文云維萬曆壬寅歲五月丙午朔是首冊應改爲次冊至壬寅五月止前後八月得詩一百八十四首文三十二篇不可謂之不富第不得總名南有堂集耳而辛丑所作又不知他集有之否百穀集廠肆常見未購歸鄉人金漣生有之當取以相校也

百穀江陰人僑寓吳中負盛名江陰志傳嘉靖末游京師客相國袁煒第煒試諸庶吉士紫牡丹詩不稱意屬穉登

爲之大稱賞將薦之朝未果煒卒穉登哭其墓集中光祿

少卿行甫吳公誄云世皇帝恭默求神似海宇（靈）謚丞相

修平津故事召致賓客都門客最盛乃設史局校書得以

青衿給筆札如漢蘭臺石室矣余以文榮相薦公以江陵

薦先後並直史館文榮薨左相擯余弗獲拜一爵（野獲編云袁元

峰少傳最善百穀山人以爲異材欲援之入詔敕志傳又

房如談相張文憲故事可至卿貳會袁卒不果云申時行以元老里居特相推重王世貞與同郡友善顧

不甚推之穉登亦不爲之下及世貞歿其子坐事繫獄穉

登傾身救援人以是益重其風義集中有申少師適圃雜

詠詩簡申少師詩和申少師除夕元日二詩又有重過瑯

琊長公宅問王房仲病詩有云弇公眞天人名高道何尊

白骨尙未寒魚肉其後昆昨日青宮開四海皆蒙恩云胡
佳公子獨不免覆盆未釋城旦春猶然鉤且髡皆與志傳
合其爲人亦可見矣光緒丙申邑後學繆荃孫識於金陵
之鍾山講舍

方東樹儀衛堂集跋

儀衛堂集十二卷外集一卷年譜一卷桐城方

東樹

植之撰

外集駢文年譜其三從弟

宗誠

刊集時所編次植之學問淵

博文筆銳穎惟好與漢學家爲難其所撰漢學商兌一書幾
於極口痛詆以自張其保衛宋學之功是集大旨亦不外是
不知漢學閒有穿鑿非讀破萬卷不能下隻字宋學則明心
見性出自禪宗迂論妄談禍人家國史冊所載百喙奚辭況

今之士大夫早年讀四子書攻時文以覬覦富貴父師之教在是子弟之志在是曰心曰性曰理曰道爛熟胸中奔赴筆底已數十年於茲晚年取閱語錄一二種覺平日所見聞者不甚相遠其襲取也甚易其託業也甚高遂儼然託體考亭分苗洙泗曉曉聒聒自命聖賢非惟漢學之罪人亦宋學之罪人矣集中切問齋文鈔書後以

國朝大師戴東原惠定宇諸先生與明焦楊並論植之非全不知黑白者不過不與焦楊並論不能快其私說耳書錢辛楣養新錄後謂錢氏以南宋之亡歸獄鄭清之由於廟堂之上習聞迂闊之談而不知理勢植之則謂收復正論也不可謂之迂闊而其爲鄭青山解也則謂清之爲相慷慨以天下

自任及元人收復三京許歸河南之約千載一時之機會喜
不及待故不暇積食蓄兵急往收之不知積弱之宋與新造
之元舉兵相抗國家存亡在此一舉倉卒而進潰敗而歸安
得謂之不迂闊安得謂之不冒昧又謂南宋之亡由於用道
學不盡使眞有志於恢復如越句踐燕昭王舉任賢才如魏
文侯魏孝武將收復可必何致速亡使諸將秉承定算堅忍
不退且以三京本吾故地大義折之盟信要之元新得中原
事勢未集未必不退而聽命如仍不聽則用趙奢閼與之說
力戰致死以勇爲勝師直爲壯必可勝之如此而又不勝則
用田單卽墨之謀因戢民之怒退而修備激起人心志在必
於收復則中原可終爲我有也試觀眞德秀爲相魏了翁爲

將盡用道學諸人爲侍從爲守令能當伯顏阿朮之鋒乎能
力戰致死如趙奢關與之戰乎能激起人心如田單卽墨之
謀乎以此責錢氏可謂不善擇言者又謂蒙古之興由召用
姚竇王許表章程朱之學以致至元之治元用道學而興宋
何獨用道學而亡不知元之興由於忽必烈木華黎之善戰
乎由於姚竇王許之善教乎宋之亡亡於兵力不敵耳未聞
簞食壺漿以迎元師也未聞干羽兩階以格元廷也史之稱
姚竇王許仍是標榜習氣並非實錄能據以駁錢氏乎集中
論時事各書亦大都類此至於語語惡詈幾同市井卽宋學
家亦屬下乘南皮師云植之本屬漢學後自揣不能勝諸家
故反用之以獵取名譽爲溫飽計亶其然乎

朱希真樵歌跋

樵歌三卷宋朱敦儒撰敦儒字希真洛陽人紹興乙卯以薦
起賜進士出身爲祕書省正字兼兵部郎官遷兩浙東路提
點刑獄上疏乞歸居嘉禾工詩及樂府婉麗清暢秦檜當國
獎用騷人墨客以文太平復除鴻臚少卿檜死敦儒亦廢見
宋史文苑傳四朝聞見錄希真有詞名以隱德著思陵必欲
見之累詔始至上面授以鴻臚卿希真下殿拜訖請致仕上
改容而許之五老堂詩話希真詩詞獨步一世居嘉禾秦丞
相欲令希真教秦伯陽作詩遂除鴻臚蜀人武橫作詩云少
室山人久挂冠不知何事上長安如今縱插梅花醉未必王
侯著眼看希真舊有鷓鴣天詞

見集

故以此譏之能改齋漫

錄希真流落嶺外九日作沙塞子詞

見集

不減唐人語竹坡

詩話頃歲朝廷多事郡縣不頒曆希真避地廣中作小盡行
澄懷錄陸放翁云希真居嘉禾與朋儕詣之笛聲自煙波間
起頃之權小舟而至則與俱歸室中懸琴筑阮咸之類檐間
有珍禽俱目所未覩籃缶貍果實脯醢客至挑取以奉客靜
志居詩話城南放鶴洲南渡初禮部郎中朱敦儒營之以爲
墅洲名其所題雖不見地志觀樵歌一編多在吾鄉所作此
說近是花菴詞選希真東都名士天資曠逸有神仙風致西
江月二首見集可以警世之役役於非望之福者貴耳錄希
真月詞有插天楊柳何人推出一輪明自是豪放賦梅詞月
橫枝銷瘦一如無但空裏疏花數點語意奇絕如不食煙火

者希眞著有巖壑詩人集一卷又有獵較集均不傳樵歌三
卷阮文達經進書目依汲古閣舊鈔本進呈而書亦罕見吾
友臨桂王佑遐給事彙刻宋元人詞鈔得知聖道齋所藏汲
古閣未刻詞內樵歌拾遺三十四首先梓以行今年正月新
安友人以吳枚庵鈔本見諭如獲環寶三卷計二百五十五首
首尾完善亦無序跋不知源出何所第與拾遺相校均在其
中同爲汲古鈔本何以別出拾遺殊不可解惟貴耳錄所舉
二詞俱在想無甚遺佚矣

宋刻鄂州本花閒集跋

花閒集十卷宋十行行廿字本現藏山東聊城楊氏海源閣
系南宋刻以冊子紙印行其紙背官銜略可辨識者曰儒林

郎觀察文使措置酒務施 成忠郎監在城酒務賈曰成

郎本州指使差監拜斛場吳 江夏縣丞兼拜斛場溫

郎本州指使差監大江渡潘

進

似義字

尉差監豬羊櫃

董

進

似義字義副尉本州指使監公使庫范

鄂州司戶參軍

戴 成義郎添差本州排岸差監本津關發收稅劉信義

郎本州准備差使監公使庫朱除江夏縣丞鄂州司戶參軍

二官餘皆添差官監酒務者二兼拜斛場者二監公使庫者

二監大江渡者一監豬羊櫃者一監本津關發收稅者一凡

十人觀察文使從八品宋職官志云幕職官縣丞從八品宋

志云諸路州軍繁劇今戶二萬以上增置司戶參軍從九品

文獻通考云諸州置司戶參軍掌戶籍賦稅倉庫交納儒林

郎等階宋志云儒林郎爲觀察掌書記支使防團判官等文職階今結銜與志合成忠郎進義尉進義副尉皆武職階成義郎信義郎均不見於職官志志又云監當官掌茶鹽酒稅場務征輸及冶鑄之事諸州軍隨事置官建炎初詔監當官闕許轉運使具名奏辟一次以二年爲任實有六考方許闕升煩劇去處許添差一員合選差文臣處更不差武臣淳熙二年詔二萬貫以下庫分選有才幹存畱一員指揮諸班官直親從親事官保義郎以下差充建炎四年詔每州以五員爲額今監酒務監斛場監大江渡監豬羊櫃監公使庫監本津開發收稅皆在添差官之列然已不止五員矣鄂州酒務中興繫年錄云紹興十二年右司鮑瑀總領鄂州大軍錢糧

先是琚奏岳飛軍中利源鄂州并公使激賞備邊回易十四庫歲收息錢一百六十萬五千餘緡詔以鄂州七酒庫隸田師中爲軍需餘令總所稽收是鄂州酒務爲最旺之所公使庫朝野雜記云公使庫諸道監帥司及州軍邊縣與戎帥皆有之然正賜不多而著令許收遺利以此州郡得以自恣開抵當賣熟藥無所不爲其實以助公使耳餘皆無考冊紙皆鄂州公文此板其刻於鄂州乎

存餘堂詩話跋

右存餘堂詩話一卷朱承爵撰承爵字子儋江陰人明國子監生工文詞精鑒別所蓄鼎彝名畫法書及宋元梓本皆不下千品號西舜城居士又號盤石山樵晚更號左菴著有鯉

退稿灼薪劇談等書今俱未見此詩話編入藏說小萃論古有識無所偏倚在明人詩話中最爲上乘天祿琳瑯載宋刻文選有朱印子儋存餘堂印二印羣經音辨有朱子儋印行素堂圖書記左庵集瑞齋盤石山樵西舜城居士各印記鐵琴銅劍樓書目離騷集傳末葉有舜城朱承爵校讐訖一行卷首有舜城居士子儋二印式古堂書畫攷張來儀懷友書畫合卷後有一行云嘉靖壬午存餘堂重裝下鈐朱子儋左庵二印所藏之富略見一斑又天祿琳瑯載黃太史精華錄後有承爵跋云任子淵精華錄選予嘗得其目錄蓋宋元祐閒刻版而亡其文愚輯其辭而完刻之云云館臣以板式紙質誤定元人其刻之精可知讀書敏求記云阮嗣宗詠懷

詩行世本惟五言八十首朱子儋取家藏舊本刻於存餘堂
多四言十二首讀者勿漫視之是其所刻書向爲藝林推重
不獨以愛妾換朱槩漢書一事膾炙人口也明江陰藏書兩
家得月樓李氏往縣東赤岸子儋住縣西舜城兩家之書均
已星散得月樓尙存一節本目錄子儋并目不存尤爲興慨
云

薦華山館詩文遺稿跋

光緒己卯冬讀江南闈墨見第三名爲溧陽吾宗堅士五經
文神味淵永經術湛深迥異於同時名輩次年堅士赴春官
始得相晤方知先德武烈公與雲士世父同官浙省先君游
浙亦訂昆弟交而堅士襟懷灑落與余尤相莫逆癸未丙戌

君赴春試必數數晤並識其哲舅恆庵丁亥三月杪君到京
以知府謁選五月五日君猝中熱疾一昔而殞余聞信往視
君目已瞑與弟祐孫同哭之偕君友姚舍人製芟楊編修華
伯敏君於旅店而電促恆庵於天津翌日恆庵至扶君柩而
還才人厄運古今同悼今年恆庵寄君薦華山館詩文數冊
云將付梓人屬爲編次刪去重複者去其游戲者得詩
篇文篇釐爲卷以海上厄言附於後君夙負經濟才
所言皆欲見爲設施又從外舅金眉生廉訪游心胸益開拓
問學益深邃使天假之年所至胡止於此昔讀武烈公遺集
詩宗浣花義山文氣靜穆出入南豐眉山之間吾宗自效顰
集從野堂後未有能並立者君詩文俊拔而骨幹未堅則年

限之也危言十冊於中外事宜尤能窺見其大不張皇西學
不墨守成規無矜異之論無迂謬之談非勦襲敷衍以炫人
耳目者比惜君年未四十官未眞除旅食京華一棺戢影老
母在堂遺孤尙幼功名學問兩無成就千秋表見止此而已
不亦悲乎余定君集兼識數語以覆恆庵回首當年音容如
覩挑鐙灑墨不自知涕之何從也光緒辛卯七月江陰繆荃
孫識於德州道中

崔孺人文集書後

歲癸酉荃孫自鄰水至合州日行萬山中巉嶙岬嶭奇險倏
詭忽得一境平疇數十里修竹美蔭流泉有聲小橋通人中
有茅舍野卉著籬落閒紅白點綴遂畱宿焉是夜月輪初滿

皎如明鏡四山沈沈入夢倚枕假寐忽聞鳥鳴乍高乍下流連往復其聲窈然以深潏然以感令人悲不自勝詰朝問之士人曰此杜鵑也月夜則鳴鳴則嘔血摘所棲之枝示余果血痕斑斑點滴未已也傷哉天地蕭颯之氣偶有偏中愁苦哀怨遂百倍於尋常屈靈均之離騷劉更生之封事李令伯之陳情表千秋下讀是文不知是淚是血是筆是墨但覺渾然有感於中而不能終日今讀崔孺人之文集愁苦哀怨有非他人所能堪者而血淚筆墨亦合而爲一其窈然以深潏然以感十年前之境界恍忽如目前也亦可悲已

書碧血錄後

嗚呼讀史至明熹宗朝童昏失德闕寺植權未嘗不廢書三

歎也然而史臣載筆懼以瑣屑微其書故老傳聞或以虛誣沒其實乃有身親囹圄目擊恣睢碧血千行丹心一寸如燕客所錄有足述焉熹廟初元國家多故鄭妃之權方替李侍之氣復張楊左二公首夷大難翼鳳輦以行忠能捧日戢虜晨之微誠可格天同時諸君子嶽嶽於朝錚錚者鐵簪辛毗之白筆伏史丹之青蒲忠正盈廷翕然望治甚可觀也無何政入宮卿位尊媼相本無孫程截衣之誓而有左棺回天之力并少單超嚙臂之盟而懷士良挾君之智茄花委鬼早應夫童謠毛卵鉤鬚得肆其流毒分甘陵之部刊章名捕籍元祐之黨勒碑示禁遂使緹騎朝發園扉夕滿獄成北寺士盡南冠楊花義子重緇羅織之經喬木世臣悉就便輿之考呼

天而巫咸不下蹈海而精衛難填地擢黃芝天經白氣加范
滂以三木具李斯以五刑火煎鉄斧生殘戴就之尸靈護縑
囊死辨杲卿之髮嗚呼慘矣若夫收者在門檻車就道生還
無路死別有期或感敘其生平或遙訣夫親故戒子數語歌
泣夫鬼神正氣一歌磅礴夫天地雲棲泚墨不宿諾於緇流
止水濯纓緬遺芳於正則二百年之培養士氣長留十萬眾
之號呼民心若此當死而死求仁得仁迨夫太阿立斷綽楔
增褻祭關西之墓漢鼎難扶復司馬之官宋社終屋則斯編
也亦之推冤魂之志光祿鑒誠之錄也已夫謁者四星上應
象緯奄人六職統之太宰不過司奔走備掖庭耳奈何手握
玉章口銜天憲黠鼠憑社醜狐跳梁必燹寵如桓公而勃貂

方能專齊柄必慘覈如胡亥而趙高因以執秦權墮祖宗之
良法釀盜賊之陰謀政體既乖國本亦撥小平津之走漢之
禍亟矣而唐復仍之白馬驛之誅唐之禍烈矣而明復蹈之
覆轍屢誤厝火不驚履霜堅冰當防其漸毋使後之視今猶
今之視昔也

旌表節孝族嫂王孺人守節立嗣記

嫂王孺人陽湖王君守靜女年二十有一歸族兄繆光佐三
年光佐歿生子不育僅遺一女嗣夫兄子保抱乳育半歲又
殤近支凋零久未定嗣光緒壬辰同族議以族弟福銓之第
二子爲嗣名永裕年七齡於是祀祖宗會戚黨注譜牒無浮
言無梗議嗣遂定而孺人年已六十六守節亦四十餘年矣

豎順客啞爾笑避此一時也樂何如之加以懷古蒼涼登高
躑躅帶駟馬之名橋鏡沈犀之舊浦草元亭廢斷壁棲煙濯
錦江空流波咽夢茫茫對此黯黯添愁蕭風蕩其魂魄古懷
生於襟裏同此豪宕斛律勅勒之歌儼其翰墨沈約郊居之
賦又豈可付之冥忘視同泡電乎僕也老屋數椽荒江之側
素月娟灝時聞櫂謳斜陽赭村閒禽樵唱尋友于之眞樂銷
佳印以清談此境此情宛然心目而運當蛾賊劫墮龍沙星
飯十年飄輪萬里今欲買田陽羨載酒蓉湖朋舊之好聊續
往游飢飽之情不牽念慮流光易馳虛願莫慰落落四海負
負寸心讀畫申辭慨焉歎息

節孝張孺人頌

孺人姓李氏浙江鄞縣人贈武略騎尉李振國之女也年十七歸同里張介庵先生韶儀褻采令聞淑慝年甫笄卽操量鼓時舅姑已歿憾不逮事歲時祭祀必誠必敬割肉之正以薦几筵卻蒿之邪以誠子弟點心之方寄於鄭儻之嫂曼首之法得之盧諶之家固已四德是表尤嫻允洽矣自介庵先生臥疾至於屬續孺人藥裏親緘鏡匱不敢仰天泣血頓地搏膺聆彌留之言若刀錐之刺耳撫伶俜之裔恍葑蕀之待枯葢自乙卯之秋迄丙寅之夏十餘年中幽憂危苦屢經疾疚復構亂離冰寒槩苦萃此一餐朝蠶夕鹽懸於十指日慘慘兮在牖風蕭蕭兮向晨九幽之黷黷不麗陽烏四序之推移欲剛春日迫至康伯學易迴非在抱之時曹穀成童能

通續史之義而孺人已不及待矣孺人卒於同治五年五月
後二年郡縣上其事

旌表如例又九年肖庵成進士改庶吉士

覃恩勅贈孺人嗚呼

天語褒嘉藉慰匪石之節祭筵豐腆終傷陟岵之心荃孫與
肖庵先後出長沙王一梧師之門夙訂心知飫聞懿訓謹援
中壘之義爰序其事而申以頌曰

進娥翦髮正流圖形猗歟仙李奕葉扇馨綢躬淑慎秉志貞
直母具師資婦兼子職孰云卒哭何間初終孰云學賈遂墜
儒風綽楔門高柏舟詩苦載誦清芬式我士女

祭周小棠通政文

嗚呼哀哉茫茫天道杳冥難知天既生公命止於斯官不疑
丞壽不期頤忽焉摧折萬日同悲公生宜興蜚聲最早

中祕紬書儀曹視草一事百思窮朝徹曉千莫鋒鉉璵璠
寶哉我總署彈壓宸瀛惟文文忠中外同傾引公爲助笙磬
諧聲狷狷狂吠齷齪紛爭批亢擣虛殫慮竭誠一字之下堅
於長城過卑眾詬過亢眾驚叩峽九折化爲夷庚是非鋒起
蜩蟬沸羹日久事定自有公評入載京尹綏靖甸服心爲明
鏡無微不燭方駕次公無愧孝肅

魏敏果顏京尹堂額曰我愧包公

地發殺

機龍蛇起陸赤子莘莘魚頭而哭急請

國帑爰設糜粥若或迫之拊循鞠育裨消返祥骨枯生肉幽
谷麗陽寒門噓燠造物失權子孫種福循聲偉績日聞於

天司馬司農憂界仔肩負此聲華謂卽騰鸞彼獨何心指摘
拘牽市虎空惑樊蠅自便

聖慈浩蕩終予矜全納言仍擢少宰兼權公益感激涕泗漣
漣客秋九月寒疾顛連胡不遄歸息影江壩恩重命輕生後
義先饑溺之忱思竭拳拳一息尙存百憂共煎巫陽下招奄
歸重泉嗚呼哀哉睠言交友無閒存歿愛土若饑不嫌鶻突
彙征拔茅坐暘蔭樾受

命衡文心細如髮毛義喬元蜀秀競發校藝

大廷復得蒯越采玉崑岡求珊溟渤譽不容口感眞刺骨雲
馭已遠流風漸歇八百孤寒何門請謁嗚呼哀哉予初識公
歲在戊辰一言契合交若飲醇勿以舛陋說項逢人洎修府

志重備咨詢予氣甚銳執簡斷斷公每優容微志獲申成卷
百卅校籤嶙峋殺青未竟山頽嶽淪音容終闕手翰猶新華
屋山邱慟哭車塵清酒旣奠生芻旣陳詹詹小言聊志其眞
尙饗

孫竹筠先生象贊

夫庶草薿薿而貞松挺空谷之標頑石磊阿而禮玉蘊千霄
之彩其氣盛者其天全其性剛者其質懋用能任艱鉅破危
疑干莫之鋒剗物而輒碎羽簞之勁洞堅而不撓雖見疑於
庸眾寶奉教於大雅前哲遺型邈焉尙已君姓孫氏名元楷
字用脩江蘇無錫人幼籍豐華長眇清約天稟亮毅鄉里敬
憚子橫直節流聲於觥觥充宗篤學彌彰其嶽嶽雖復相孫

陽之馬說歐治之劍目無餘子看斫地兮狂歌自負異才逞
籀雲之逸足然而劬書百楨組織零璣射策十年沈淪太璞
旋以博士薦爲校官邑有楊家圩爲明周文襄公所開歷年
旣久潰決者屢君深其受水之泓清其出水之路先去水害
始籌水利萬聲邪許鍾雲渠雨之時百堵縱橫葭渚菱波之
外遂能奪彼汜濫安我耕鑿咸豐癸丑振策入都河決豐王
徐海昏墊浮家者多於逐波之鷺狎水者密於慕羶之蟻君
睹影心悽聞聲念結耳衣腰囊易餅餌以給窮黎仁粟義漿
貸升斗而甦涸轍治裝而出徒步而歸義聲聞於天下至行
傳於閭里旋選深水教諭值金陵初陷蘇常告警邑令畱之
舉辦團練君嚼齒雷鳴奮髯風怒以負山之尺土當卷地之

狂飈以烏合之鄉兵拒鴟張之毒蝮乃黑山張燕雖多助逆之羣而白棒王黼竟作當道之臥偕女嬃而轉粟營免量沙率里士以荷戈人皆嚼鐵旣而妖鳥夜鳴軍容朝墨桑梓淪陷井里蕭條復將北府之兵思救南中之難枝梧強敵轉徙戎行敝功得光祿寺署正銜復以知縣分發浙江補用廖禍遽前江成無警髑髏浴血模糊大地之魂荆棘刺天飄墮誰家之宅真同鬼境罕有人跡君乃掩骼骼疏溝洫製紡具給籽種建宗祠以敦族設義莊以拯貧獨於喪亂之餘具施濟之量其才愈遠其德愈宏已旅途告瘁恆幹遽謝識與不識同聲嗟悼君立志過高任事過勇動輒駭俗退有後言蓋自道咸以來士大夫以模稜爲曉事以諧媚爲知機以推諉爲

謙沖以嘯嘯爲儒雅隨聲附和成則巧攘其功遇事逡巡敗則倖逃其罪遞相祖述播爲風尚君則明鏡屢照無幾微之弗燭霜刃立斷無二三之顧慮獨擅宏達之學兼裕骨鯁之氣足令腐生掩耳小儒咋舌此則衝霄之翮非樊鷁所能知逸塵之駿豈跛鼃所敢誚者矣命予叔盃中翰榮郁繼聲遷談濟美出脉遺象徵及鄙文夫樂陵曼倩孝若興異代之悲州來季子邠卿引古賢爲友況荃蓀里閭相接音微未洙詔銘景行敢匿謏詞爰作贊曰

世風頽靡君獨奮往命輕鴻毛義重熊掌何氣卓犖而貌仁慈風微邈然百世之師

戴澍人太守東游十六圖贊

名泉七十二深冰之源荷衣粉膩葦帶雲翻好風徐來微波不

喧李杜已矣古亭猶存

大明湖

蒼翠壓城琨瑞北麓雒華迎眉鴻流繞足

山半望見黃河

入門一笑

古佛巖腹開皇鑱字凍蘚皴綠

千佛山

高閣凌雲層城壓水凡席之外海天萬里蜃市馮虛樓臺彈

指秦皇漢武求僊如此

蓬萊閣

神龍蜿蜒破壁而飛古洞天半呀然雙扉一區再僂鼎銘依

稀回首錦屏滉漾朝暉

龍洞

岱宗廟祀肇自炎漢雲氣迴翔神光璀璨秩視三公典禮攸

備柏翠松蒼陰森天半

岱廟

霧閣雲窗瑤池尺咫帝王升封咸憩此水鴛鴦名碑介福降

祖六帝一后儉德堪紀

王母池

矯矯秦松化龍飛去孫枝彌谷偃蹇支柱沐浴露漿離披煙

絮寒濤滿空天風暗助

對松山

是日岱頂呼吸通天手摘星辰身御雲煙大碑不文氣象萬

千諸峰羅列兒孫滿前

岱頂

泰陰環道亙古積雪危若蜀棧窈如包穴石乳涓涓不絕鳴

咽蓮瓣倒垂萬仞削鐵

後石屋

巖何以靈朗公說法松暖日寒石闊天狹孤鶴折翎癡龍卸

甲此心瑩然靜參白業

靈巖

背洙面泗遺宅舊基如日中天斯文在茲堂上車服壁中金

絲麟紱虹玉詎驚神奇

孔子廟

元氣不死發爲菁英楷本四垂蒼草百莖森森嘉植博物難
名得碑林外我羨何生

孔林

太白仙去酒香浮浮菡萏百頃薜荔一樓棲煙點鷺斜日明

鷗詩情愈暢古懼轉幽

太白樓

大小二勞神仙所窟平擁百城秀擢萬笏擎紫圍雲采珠捉
月安期羨門來往飄忽

勞山

山斗入海直趨遼東秦橋不成鞭石成紅椒島林立足拒艤
臚易占設險地利誰同

成山

崇山千丈高臺三成築祠禮日浴海有聲景觀風渺斯篆苔
生殘磚頽瓦強以秦名

瑯琊臺

佛圖關贊

重慶古渝州也西毗羅殿東俯夔巫危堞翼張重欄鱗沓嘉陵流其北岷江繞其南惟迤西山梁僅通步騎醜石鬻礪古木陰翳而屹然雲表竇握其衝者則有佛圖一關焉神龍東來斗覆其首嵒岨崕崕巖嶙屹嶺千蹊萬壑爭茲一綫攀陰斂陽攀此四扇螳緣猿奮螺旋蟄行十步九折始達其巔長松吼濤生於足底飛鳥接翅墮於目睫泥丸可塞捷徑罕通誠神舉之奧區天府之關鍵也蘭酋盜兵蕭牆訐起綠髮喧穴赤眉翻城礮雷晴飛刀雨夜逼石砧將軍躍馬來援帚箸並舉旌旗載麾斯關旣拔樊龍授首犁庭掃穴曾不踰時聖清御宇鏡澂砥平武庫戢兵旗亭臥鼓而近年以來滇匪陷榮永竄涪播渝城尺咫晏然無恙所以折凶狡之鋒而作

士民之氣者一以斯關爲可恃僕以盛夏策馬來游朝雨初
收溼雲猶漬椅桐蔭天濃綠灑袂竦筵礙日微紅篩衣巴淦
左右恍披安世之圖城郭縱橫如聚馬援之米爰思設險之
意倍深懷古之情乃爲贊曰

雙江束城微通山脊門虛欲雲天低補石一夫次且千人辟
易成敗古今視此成迹

濠堂銘爲鄭蘇堪作

荆山卸麓淮水分渠楊吳舊濠高密新居地疑城野跡狎樵
漁中層樹屋諸葛草廬小築三弓疏櫺五尺隔岸桃紅橫綺
柳碧巢燕語晴沙鷗盟夕隨意琴書成行褰屐纖雲卷幔新
月舒鉤茶香沁夢酒乳盈眸訪碑撫象

觀所臨天發神讖碑談天揖鄒

縉圖闕叙詩意夷猶東島采風西槎卻聘吏隱如仙書工近
聖心遠自閒境虛稱靜筆乘茗談不忘名姓

快園秋色賦

畊甫中表觀察湖北鹽法武昌五年於茲矣署後餘地借山
成園蒔布政蔗農泐之迺因舊基遂結新構無華靡之飾有
登眺之樂荃孫以甲午秋日寓茲園浹旬岑樓挹涼廣廈祛
暑畫廊繚曲空水澄鮮據江山之勝蔚爲大觀處城市之中
別饒野趣課晴喜雨民物繁乎寸抱朋風友月憂愉繫乎一
室秋容怡人快何如哉昔齊安夢得之亭鏡湖放翁之閣以
今方古名實相稱道州何詩孫圖之義（監）陳右銘武進屠靜
三再記之而荃孫爲之賦其辭曰

揚州官閣永嘉射堂取刺水火時調雨暘闢坡陀之隙地開
翰墨之名場聯鑣褰屐接席壺觴新雨如沐輕颺已涼攬一
襟之秋爽絢滿目之秋光有山蜿蜒層厓敝綠分高觀之一
支繞衙齋兮半曲官相曾此棲遲蒯侯於焉卜築悵舊跡之
漸湮慨清游之誰續接勝地兮南樓拓名園於北麓爰刪灌
莽迺闢閒庭高低酌檻疏密添櫺櫺撐雲支丁邀月補亭疊磴
懸綫危樓建瓴淩虛兮縹渺入望兮杳冥納牖則野延萬綠
窺簷則天抱四青曲徑通橋前灣鑿沼水氣烘晴霞光絢曉
叢翠擎蒲嬌紅刈蓼潑刺跳魚襍褊浴鳥洗硯兮鏡揩流杯
兮帶繞契濠濮兮座中傲滄洲兮塵表門敲竹醉石碎苔縫
桐肥集鳳柏瘦擎龍青垂薛荔紅鄆芙蓉蕉展心兮露滴柳

舒眼兮雲慵盆秋韻古瓶夕香濃節日影兮瑣碎暈花光兮
複重鵲噪芳辰蜂喧正午蜨聚嬉春燕歸識主叶宮徵兮鶯
簧問官私兮蛙鼓狎點水之蜻蜓誦經之鸚鵡選勝紅茵
擎芳碧臨摘麗藻而盍簪罪清言而揮塵今夕何夕寥天欲
霜黃花三徑紅葉半牀寒空過雁深院唳螢輕陰卷乎篁岫
涼思襲夫蘿裳浦裏青荷之鏡山巔金粟之香雲屐過重陽
之節風衣登千仞之岡遠則雉堞排雲鯨波漱岸帶蜀襟吳
面江肘漢羽翕街衢鱗次里閭雀舫艤於城隈鮫宮峙乎天
半瞰鵲磯則羨費禕之得僊晒鸚洲則慨禰生之赴難羌古
往兮今來幾星移而物換麗矣圖畫之奇壯哉几席之玩時
若鄒枚接軫孔李開筵帖臨青李幕敞紅蓮敲碁誦癖拜石

呼顛茗水鵲華之卷米家虹月之船仿永和之故事談天寶之當年酌金谷俊游之酒賦玉山紀勝之篇是則寄興林邱縈情雲壑逢暇日以自娛幸芳暉之有託一詠一觴半村半郭水木清華鳶魚飛躍顧妙境而怡然驗庶徵之時若又何羨向禽五嶽之游劉阮重來之約

先母瞿恭人事略

嗚呼自吾母之歿至今三十四年矣吾十二歲而遂喪吾母時吾母以七月望日病始而瘧繼而利終而下血病遂殆吾父從軍金陵大營八月十二日吾母暈絕予號泣狂呼逾時而甦甦後神志轉清十八日吾父從營次歸吾母自知不起處分後事至周且密至二十六日卯刻長逝彌留時予起趨

牀前吾母口不能言轉瞬視余良久淚承睫須臾遂暝是時
哀慘之狀三十年來何敢一日忘也予四五歲吾母授以千
文及唐宋人小詩六歲就塾塾中童子二十餘咿唔雜沓罕
能成誦歸吾母必令重讀音有訛句有誤正之惟謹予時甚
以爲苦而反樂趨塾窗北設竹榻予坐一小倚子陳書榻上
吾母坐於榻手鍼黹而督予讀日以爲常歲己酉外王父綬
伯公自濟歸舅妣董太恭人祖宅鳳官巷口吾母挈予入
城省視外王父常令予誦所讀書慰吾母曰是子口齒清記
性好將來或能紹書香也吾母亦顧予而有喜色歲甲寅外
王父殉難金陵外王母馮恭人走常州舅妣遷至吾邑西鄉
吾母挈予往祭外王父慟絕者數四與舅妣述家事必涕下

霑裳迄今長大追憶吾母之聲音笑貌雖尙髣髴一二而不可得其詳矣吾父常謂予曰外王父先以郎中分水部繼保知府候銓初境寬裕後漸窘迫外王母楊恭人歿遺子女六人汝母居長最幼者五舅氏甫數歲賴汝母煦嫗鞠育終得成立復支持家計外王父酒食衣履籌畫至纖至悉迫外王父續娶馮恭人汝母歸余十餘年矣歲丙申外王父客游命汝母挈全家附糧艘南還途間覲疫三四兩舅三日間繼逝是時無僕從無資斧驚憂困迫殆非人境汝母夢寐中因有驚悸之疾每談是事淚未嘗不泫泫下洎來余家大母年高時時臥疾汝母侍疾維謹助理家政待人以和大母歿家境日艱余時出游家中事井井有條汝時尙幼未必能盡知也

吾父又謂予曰外曾王父金陵新居高開宏敞有竹木泉石之勝與孫氏五松園相埒汝母來余家屋僅容膝每遇炎暑如坐甑中無幾微怨於顏色此亦人所難能者嗚呼吾母之歿至今三十四年矣歲月日以遠音容日以渺所憶所聞者止此而已罔極之恩畢生莫報略志梗概以詔後人光緒十四年正月男荃孫泣血敬述

亡婦莊孺人事略

孺人姓莊氏名思璫元和人父裕崧甘肅鹽茶廳同知署平涼府知府城陷殉難

贈太僕寺卿銜母蔡恭人弟三人姊一人妹一人以同治丁卯十月年二十成婚於成都庚午生一女辛巳隨予至京師

甲申五月十三日以疾卒得年三十有七哀哉孺人性情淑
婉最爲外舅所鍾愛外舅以畫名家孺人亦工爲花鳥小品
外舅殉難鹽茶蔡恭人挈子女閒道走四川時賊烽四起滿
地荆棘孺人年甫及笄卽能佐蔡恭人處分行李蔡恭人歿
從外舅裕筠迎之官舍其事叔父叔母也與父母同泊來予
家兩親愛子息無苛禮定省之暇不廢鍼黹予終鮮兄弟然
門以內伯母寡嫂孤弟猶子幾十人孺人仰事俯育無有失
禮予官翰林專人迎養孺人侍兩親浮江東還下瞿塘度鄂
渚過建業小住蘇州明春仍由運河入都行路八千里爲期
二百日開關險阻而後得達予性不耐瑣屑事京秩清苦食
指繁多孺人經營摒擋常不使兩親知予喜購金石書籍雖

典衣貸賃從無交謫復以母家遠別覲面無期心力由此日
耗矣孺人好絮除几席予每陳書滿室而出俟入室則一一
整齊院有桃李丁香葡萄海棠隙地復種瓜壺支蔓引藤一
室盡綠窗明几淨相對怡然有小閣可望山下瞰菰蒲蕭瑟
榜曰涵秋朱椒堂先生筆也孺人最愛之暇輒登眺其上每
當雨過月來煙生雪霽相與焚香啜茗煮酒圍鑪極盡倡隨
之樂壬午予大病癸未孺人亦大病病皆幾死同人咸勸移
居孺人輒阻之曰君以此室爲不吉耶人生不能無病病而
獲已何吉如之言猶在耳孰知竟歿於此室耶予結褵十七
稔四應禮部試又幕游川東西往往二年始歸歸數月復
出屈指相聚之辰不及十載侍奉之事悉以委之常誦陸祁

生大令生明珠掌上看頻年翻借婦承歡之句謂若爲吟
詠也者惟辛巳至今未曾一刻離孰知不及三年卽永訣耶
自生女後十四年未孕常勸予納妾予應之曰百年偕老亦
瞬息耳忍以他人閒乎如以似續爲言俟君年及四十乃可
去冬有娠孺入益自喜禮佛茹素以所得男孰知不及免身
而遽以他疾逝耶與姊患瑄友愛尤篤姊歿以暴疾哭之幾
殞孺人臨歿之日忽展姊氏所繪畫冊對之嗚咽俄而疾作
其速也亦相類嗚呼豈非命耶予罹茲慘酷然恐貽兩親憂
不敢不強自排遣爰次其事跡冀當世名人錫之銘誄俾幽
泉薄質藉此以傳則鄙人之哀或可少解矣江陰繆荃孫和
淚書

藝風堂文集卷六

藝風堂文集外篇

江陰繆荃孫

多羅惠郡王奕詳大祭文

朕維禮重展親恩遇必全夫終始情深求舊典章宜備夫哀榮撫旌嬰而銜悲宣絲綸而賜卹爾親王銜多羅惠郡王奕詳華分瑤牒派衍璇源河閒則大雅不羣東平則爲善最樂我

文宗顯皇帝

穆宗毅皇帝嘉其忠盡畀以榮施家法克承分玉紹龍光之寵國恩迭沛翦桐廣麟定之仁瞻文學於三天趨蹌中禁總武英之百事校理祕文疊膺圭組之華倍切冰淵之懷迨朕纘承大寶篤念宗支內領環衛之崇班望隆磐石外統旗營

之勁旅威播旌麾方期弗祿之永康詎意沈疴之莫挽鼎鐘
如昨念功業其猶新劍履空存愴音容之已渺再頒奠醑難
遣悲懷於戲秀掩金枝尚思秉度求章之雅芳流翠俎彌憶
肆筵授几之時格爾幽靈承茲嘉貺

贈太傅恪靖侯大學士左宗棠祭文

朕惟位兼將相抒鞠躬盡瘁之忱氣作星辰稱崇德報功之
典式頒奠醑用答殊勳爾原任大學士左宗棠起家孝廉授
任軍旅湖湘閩浙光底定夫東南關隴洮涼漸肅清夫西北
特畀台衡之任仍操旄鉞之權掃穴犁庭告成功於絕域酬
庸錫爵膺懋賞於通侯命入直於樞垣俾統籌夫全局迴翔
江左仍贊黃扉炳耀中台寵邀紫綬頃以閭疆之不靖俾提

虎旅以專征鵝鵠朝驅鯨鯢夕避旌旗懾敵草木知名會罷
戰而銷兵許引年而歸里何期大星遽落薄海同驚披覽遺
章良深震悼爰頒初祭難遣悲懷嗚呼生爲社稷之臣歿壯
山河之色瞻詢謀於黃髮慨想風雲緬憂國之丹心彌綸天
地靈其來格享此苾芬

贈太傅恪靖侯太學士左宗棠祭文

朕惟一德一心偉績無分於中外懋官懋賞殊恩何閒於初
終撫薄海之永清猶思壯烈驚將星之長隕倍切軫懷爾贈
太傅二等恪靖侯太學士左宗棠志篤忠貞身嫻韜略由孝
廉而筮仕受軍旅以專征由兩浙而七閩自關中而塞外陣
如山而莫撼功罄竹以難書遂得驅策風雲肅清寰宇陰陽

調變邀心簡而位列三台帶礪延長錫躬圭而勳酬五等蠶
織仿東南之利龍沙開西北之天邊圉以安民風胥靖望闕
廷而入覲襄樞密以宣猷以闕外之鄂襄作禁中之頗牧以
天下自任不愧股肱心膂之臣爲社稷而生正資舟楫鹽梅
之寄迺回翔於江介仍入直夫禁垣顧閭嶠之震驚賴虎臣
之坐鎮樓船旣下海水不波會罷戰而弢弓許養痾以歸里
何期身未離乎軍旅景已迫於桑榆遺疏上聞曷勝悽愴沛
恩綸以延賞崇祀典以酬庸眷念生平錫之上謚於戲聲淒
鼓角馬援竟歿於壺頭氣作山河趙鼎先騎夫箕尾偉烈長
垂青史殊恩宜沛黃壚渥爾寵榮尚其歆格

贈太傅恪靖侯大學士左宗棠碑文

朕惟不朽有三以立德立功爲最列爵惟五揚允文允武之
休息元老以壯猷勲垂圭璧瞻舊人而圖政銘勒鐘彝增青
簡之光輝勒丹珉而慎重爾贈太傅二等恪靖侯原任大學
士左宗棠秉性廉正涖事忠誠望重熊湘學耽蛾術舉孝廉
而騰譽入幕府而宣勞南陽則管樂自期東方則孫吳早讀
始遷州牧旋擢郎官

文宗顯皇帝拔之蓬蒿之中授以師干之任剿豫章之強寇
秩進太常總信安之援軍勦隆開府進規兩浙扼金華而直
抵杭湖移駐八閩控霞嶺而救平延建酬庸而頒上爵懋賞
而晉宮銜衣染鵝黃增華韋布冠飄孔雀耀彩簪纓旣而燄
起花門節移蕙嶺河湟萬里倚休璟以安邊原夏十州付宇

文之坐鎮揮戎逐北則畿甸塵清返旆征西則伊涼電掃迺
界台衡之重任梅鼎長調仍提桴鼓以專征瓜沙底定銘勒
崑崙之石文字不磨海澄星宿之波甲兵盡洗興蠶桑而民
生裕防虎落而邊圉清爵晉通侯慶延長於帶礪猷襄中禁
捧出入之絲綸掌武而協戎機柳營日暖治河而陳方略竹
箭波平泊總制夫兩江兼通商之五口謂長城之可恃庶薄
海之永安何舊疾之未痊屢乞身而思退念其勞勩許以歸
休暇時事之多艱復趨蹌而入覲慷慨請行之念中外皆知
老成謀國之心始終如一引高年而無庸入直預密謀而倍
切咨詢屬閭海之重驚命虎臣而禦侮旌旗變色鼓角生威
海波不揚橈雲四散方值銷兵之候復申解組之章冀調攝

於耆年長承恩眷盼休祥於上壽藉作國華乃溫詔方頒而
遺疏遽入睽懷嚙昔震悼良深贈太傅之崇階貽後人之世
爵諭重臣而致祭給國帑以治喪疊沛丹綸藉光黃壤膺
三朝之簡昇永念盡臣薦百世之馨香無慚廟食封名恪靖
用獎勲猷謚曰文襄允符行誼於戲愴此日鄂裏遽逝空畱
功績於旂常祝他年申甫復生重作天家之柱石欽承異命
峙爾豐碑

成都將軍魁玉祭文

朕惟聲聞輦鼓則思禦侮之臣績懋干城則賁飾終之典爾
原任成都將軍魁玉夙嫻武略屢涖戎旃天漢東西岷江南
北張弓挾矢親兵事者四十年斬將搴旗建奇功者數百戰

倬膺專閫用咎殊勳太樹名高長城望重迨縣車而乞退許
歸里以就閒方期永享遐齡何意竟聞長往嗚呼雲車風馬
九原之魂魄如生玉壘金陵兩地之謳歌猶昨老成云謝悼
惜尤深爾其有知尚克歆享

成都將軍魁玉碑文

朕惟國家獎卹臣鄰哀榮終始旂常紀績俎豆酬庸有能執
鼓提戈獲建非常之功業斯必銘金刻石藉彰不朽之聲名
禮亦宜之恩至渥也爾原任成都將軍魁玉持躬武毅秉質
懋誠由任子以典軍名揚驍騎懷惟寅而稱職望重虎臣戎
韜夙協機宜軍政先邀薦剡時值潢池之警適當江漢之交
俾分閫於西涼仍畱防於南國麾朱旗而列隊則萬馬銜枚

奉丹詔而宣恩則三軍挾纊始隨征於漢北繼轉戰於江南
玉節頻移金創重疊雖有時垂翅雷霆之譴責頻仍而乘勢
攻心雨露之恩施永沐朱方之坐鎮正赭寇之方張昕夕
吁庚春秋擐甲一身是膽衆志成城白下乍合呼長圍丹陽
遂奏夫新捷藉成犄角之勢共宣使轡之勞談笑安邊雍容
坐鎮裴行儉才兼文武俾攝兩江郭子儀望治華夷更司五
口河山大定草木知名迺瞻蜀郡之嚴疆再命龍驤之上將
陸贄水慄銀河洗兵甲之光士飽馬騰銅柱勒丹青之字曩
以微疇在告遂爾優閒何期徂謝忽聞深予悼惜旣殊功之
迭建亦卹典之有加狀厥勤勞謚之果肅於戲誓勦麟閣長
依日月之輝奏績螭珉足壯風雲之色貽之來禩勿替嘉聲

吉林將軍富明阿碑文

朕惟干城宿望武臣胥心腹之資鐘鼎殊勲統帥實爪牙之
寄故偉烈長留乎信史斯隆恩宜沛於重泉丹旄銜哀翠珉
紀寶爾原任吉林將軍富明阿懷才果毅秉志忠貞從軍敘
得級之勞策仕副屯田之任始充突騎繼典戎行旋總師于
出防豫省扼江南之要隘恢皖北之名城草木知名旌旗生
色彎弧而調八陣運用在心擐甲而冠三軍創夷徧體雖臣
艱克念暫許歸休而時事方殷特加徵召督禁垣之旅領江
介之防雲中則魏尚重來江左則謝安復出令嚴刁斗中天
之明月高懸隊肅弓刀如練之寒濤未歇知韓滉爲江淮保
障故甫遷荆渚而旋改吳中知行儉具文武材猷故命攝漕

同而仍兼戎事賞延于世功最曰多邁征而特許肩輿詢疾
而頻頒手詔迺吉林潛藏夫醜類俾上將重泄夫戎旃乘暇
日而繕城隍有備無患耀軍容而脩矛戟不怒而威賴茲安
內攘外之才贊成長治久安之業迫應車而乞退仍頒綰以
酬庸何期遺奏之忽來頓覺老成之凋謝大小三百戰敵愾
同仇前後五十年公忠體國核其品誼洵爲任事之臣諡以
威勤不愧易名之典於戲柱畱華表螭文爭日月之輝冢象
祁連馬鬣壯風雲之氣永垂不朽昭示來茲

湖南提督周盛傳祭文

朕惟星弧靄鼓特彰禦侮之材桂醕椒漿爰著飾終之典式
頒奠醑用答前勞爾原任湖南提督周盛傳學裕韜鈴性成

勇敢荷戈拒寇始自衛其身家捧檄募軍遂別開夫壘壘吳
門拔幟大敵頻摧皖水援枹重圍立解青齊充豫率勁旅以
馳驅黃郛鄜延奮壯猷於步伐恩綸頻沐勇號榮膺創薊北
之營屯授湘南之節鉞練兵足食效趙充國之良規治水明
農法虞道園之成議方深倚畀遽告淪殂於戲百戰曾經著
聲名於草木四方誰守寄慨想夫風雲爾其有知尚克歆享
湖南提督周盛傳碑文

朕惟躬擐甲冑武臣以禦侮爲能氣作山河國典以教忠爲
重緬懷偉烈特表新阡爾原任湖南提督周盛傳角藝超羣
顏行就伍練團而禦青犢募勇而擊黃虜功在三吳身經百
戰旌旗變色鵬城之勁敵先摧鼓角生威雒河之重圍立解

上下江機槍並掃東西捻氛祲全消轉旆而漢土肅清傳檄
而關中底定遂乃翠翎耀武黃褶增榮勳勇錫以嘉名嚴疆
建夫專閫俾提舊旅上衛神京旋移節於湘南仍畱屯於薊
北春風樓櫓首重時此金湯秋水溝渠萬眾飽夫玉粒近以
蘇波之不靖命宣虎士以嚴防特滿披堅士有難犯之色投
縮超距大懷必死之心雖軍未交綏而氣吞強敵謂長城之
可恃燕旬服茲策安何期揮戈已憚其勞陟岵復傷其志撫
枯菴而增慟賦里星奔拋弓矢而云徂三軍南泣憫虎臣之
凋謝貴龍綽以褒嘉揆厥聖華謐之武壯於戲聞鼓鼙而思
將帥素旆貳憑撫鐘鼎而愬勳猷丹忱共鑒勒諸貞石昭示
來茲

福建陸路提督唐定奎碑文

朕維御營日暖南天推保障之功蒿里風酸北闕備哀榮之
典緬懷駿烈式煥鴻哀爾原任福建陸路提督唐定奎學習
奇肱効戒練膽鄉鄰急難仗劍而前兄弟從戎同袍共賦始
拔壽椿之壘旋投滬濱之營茂苑東西太湖南北大小數百
戰縱橫六載年爰自偏裨游至專閫鵠黃織錦頭增奏繡之
華孔翠影纓特耀兜鍪之影遂建牙於成德更移節於冶城
迴因臺鄒之揚烽俾統全軍而渡水黃龍青雀海童懾琅鐸
之聲赤豹文螭山鬼避星旂之色洎因海警命扼江防駐鵠
鼻之山列魚麗之陣塞雷艦火定手畫於軍中越角吳根運
心規於掌上班聲殷地秋高而陣肆猖劉巨浸稽天颯怒而

防嚴鯨潛伺圖疾飛遽壞干城殲此典以褒揚易嘉名曰果
介於戲五更鼓角望猶重乎龍驤十夢瓊瑰兆駉符乎狸服
彤更華彰偉績特沛殊恩黃墟爰勒貞珉不惑武烈
詔名布政使劉連捷碑文

朕維襄鍾紀伐愷鼎銘勳河山成刑定之猷金石勒耀熙之
績前型弗替懋典斯存爾頭品頂戴記名布政使劉連捷湘
南毓秀楚非摧鋒始戰津黃繼規舒皖合楚尾吳頭之境奏
桂金席革之勞命屢錫夫師中威頻宣於閩外浮嬰渡水韓
信闕與之師煮鎧爲糧耿恭疏勒之守陣嚴蛇鳥令肅貔貅
黃巾之逆豎旋平白下之堅城頓復遂乃蔭隆都尉稷晉承
宣頒庸服以章身錫拔都之美號旋駐軍於恆代更移節於

潤常賦渭北之王熊鷹幢欲散歌江東之章虎巾屐鐘邊
箕星沈玉璽雨萍薦馨香而永眷謚剛介以易名於戲松檟
成行百丈祁連之冢鶴蘇永禁千秋峴首之碑載錫錯詞長
垂鏤範

湖北遇缺題秦道周康祿祭文

朕惟疆場效命臣子之太經俎豆酬榮國家之鉅典爾三品
頂戴湖北遇缺題秦道周康祿學閥太韜身經百戰爰從末
秩薦擢道員立功於鄂北桂西揚武於川東隴右尋麾赤幟
勘定黔疆屬飭卒之夜譟致危城之朝潰志成襄革傷竟伏
張軫念英風謚爲壯節於戲氣作山河忽墮垂成之業功在
社稷特施破格之恩惟爾有靈尚其歆受

湖北遇缺題奏道周康祿碑文

朕惟蓋臣遂志藉袂旌以明誠國典褒忠必原心而稱事匪
磨貞石曷安忠魂爾二品頂戴湖北遇缺題奏道周康祿忠
勤夙著輅略素嫻兄弟從戎早賦同袍之什疆場戮力頻邀
拔幟之功始發軔於粵西繼揚威於鄂北入蜀而禽狂寇度
隴而拔堅城由是薦膺顯膺崇階疊晉覩李勣之勇決與李
勣而何殊聽吳玠之聲名得吳璘而愈重榮班豸繡春風揚
黼黻之華恩錫翠翎曉日耀珊瑚之采屬以黔中之不靖命
麾綽綽以先驅慶全省之肅清駐新城而鎮撫彤弓茲矢方
褒飲至之勳瘴雨蠻煙速覲埋輪之變錫諡無慚於壯節贈
銜克稱其聲威於戲銜溫序之鬚旣後先之競烈繪陽都之

象復存歿之兼榮永峙麟珉毋忘駿烈

戴藝郭同年采百集序

盛哉選格鍊響獨擅千秋吹影鏤塵上希四始夫惟大雅敢
云小道亦有泉明擬古東晉補亡張孟陽之四愁江醴陵之
雜體視前人之成鵠心摹手追定別格於雕龍句奇語重固
足樹騷壇之幟馳藝苑之名若乃擷先民之成句寫我輩之
閒情古調獨彈餘馨自遠繼七襄之錦吏部誰如集五侯之
鯖君卿最擅人唱竟成天籟新樂被以舊絃別具匠心洵推
獨步者已集句之作始晉繼唐傳咸清麗逸文存於類聚韋
蟾曠逸韻事續夫楚詞迨及宋人遂多此體有未入集者王
荊公是也有別成卷者孔武仲是也有專輯一家者文信國

是也代紀蘇邈風流愈暢匪云則古寔亦宜今藝邪同年天
馬在手孤鴈隱叢古懷抗雲書眼如月處選部之任以曹事
見稱有裴叔則之清通無畢茂世之脫略而且通六經之奧
心醉簡觚摹巨體之書手輒煙墨閒以餘力發爲浩歌妍魄
煉華煩腸沃耐呼明月而欲出跌宕仙心問青天而不應嬰
媿騷屑靡蕪興語繚帛悉以寫詩玫瑰獨笑僕從知其得句
清思壯采儕輩同欽一日出眎集句詩二卷集句駢文三篇
蓋吟詠之餘所戲爲也當夫妙手拈來衝口而出刻冰作骨
鏤玉爲塵以六代之古音作三唐之律體標謨觴之錦暉釘
餌何嫌展壁府之油拳搗擗不已詞條炳蔚依然儷白如黃
音節和諧仍是含宮咀徵況復艷情含雨逸思停雲

集中詩
皆艷體

夢寐瞻覽燈盞酒冷借隴西之鬼語氣鬱青霞抒樊南之綺
懷調高白雪輯玉元圃無非夜光徵材鄧林自成傑構是則
李韓翦綃之集同此清新唐堂香眉之編無其跌麗也荃孫
蠅鑽自苦瀨際何曾寶無記事之珠熟愧瀉瓶之水爾雅未
注早遺恨於蟠蜺樂府空吟艱成誦於蛟蝶元晏三都之序
僕病未能文通五色之豪君真無愧用原序語

消寒詩序

賭酒圍鑪之候風饕雪虐之天雁聲墮地助其岑寥鵲影偃
煙同此翠斂衰葉枯條士衡感時之賦雲飛冰結簡文元圃
之詩歲聿云莫寒氣入室耳目所寓心骨悲矣則有張三昧
燕飲一經程喝月月行問天天對燕金猊之炭隔坐送鉤撥

火鳳之絃張燈試曲觥籌交錯春生錦步帳中薌澤微聞人
坐繡屏風裏此一境也聲含樂殿白板扉前天賜奇溫黃絲
襖出戶習吹幽之禮人懷獻曝之忱冬學閑夫兒童籌車慰
其父老入此室處驚蟬蟀之鳴躋彼公堂放羔羊之饗瓢兒
菜熟就米飯香此一境也蜩螗塞外蜿蜒塹邊風吹刀塞
雲沈鏃匣脫其警堅冰在鬚刁斗夜鳴凍月寫影掀蘆管之
一聲去鄉關兮萬里挾纈無溫據鞍不壯息兵氣於何日長
著鎧衣望失第兮未來空緘錦字此一境也更有歲月云邁
關河未歸驚飄起而哀笳鳴征埃長而木葉脫客饗冷炙馬
槽殘酒思如潮離愁若海相親童僕莫可與言轉念友朋
誰能謀面藟麥交隴訝故園之已春菰蘆結牀棲羈夢而亦

冷此又所境也夫四時遞運開塞而成冬百歲婆娑銷憂者
惟酒吾雖心灼竹柏贊給韋弦言通驛騎常集琴尊交傾肺
奧不設峯距室妙亭臺之勝地之山水之幽方珪圓璧廣漉
浮之宜折膠墮指景追遙之館設或戢形蒿室屏跡避廬書
城枯坐則意氣不豪茶鼎苦吟則詩情亦淡何以陶茲素景
契此幽襟且夫夜長晝短古人申秉燭之游異苔同岑小雅
繹同聲之義而況縞紵相答易失舊歡燕雁代飛難回往日
或歸旌之首途或嫁衣之忙我昌黎之畱東野有願爲雲休
文之去安成一別如雨與其相思於日後孰若聚歡於當前
於是吳君又農合南國詞人作西園雅集素心結契投永好
之瓊醞浮英等群寒之主譚則塵毛落飯笑則頭髮沒酒

雖休源亦倉之米何黠白葵之羹而莖英旣耽莪菽不厭舞
詠之樂金犀奚加復搜古典各賦新詩言如鏤塵思若吹影
殿文壇之後勁續草堂之前游千聲萬色鬱爲古腴七鳳五
麟藹涵景氣儀堯階之球石襲拊永諧樂周雅之笙簧鹿羣
偕食而觴一詠幾忘雪霜之逼人以致以嬉仍倣尖叉之鬪
韻僕巧遜鏤冰歌翻團雪得過且過敢自擬於鳳凰予取予
求譬相依之蛩驅抽繭絲而附貂尾食仰芳流濡虎僕而誌
鴻泥此爲嚆矢

送顧子鵬之荆溪訓導任序

上元顧君子鵬振奇磊落人也丙申荃孫來主鍾山始識君
君工詩古文辭讀書略觀大意家甚貧而日不言天趣盎然

其立身行已皎然自拔於流俗古人所謂意思深長者其君之謂與先是咸平年吉林將軍聘修通志書進

御保以教職用今年四月選荆溪復設訓導君以是官最爲世所輕有不屑爲之意蓋孫謂之曰學官非他官比也官之職則曰教而士之稱則曰師循名而責實非他官比也君亦知學官之所自乎昔後魏天安初立鄉學置博士助教郡縣建學設官始此宋安定先生授教於蘇湖閒以經義治事兩齋得人最衆朝廷建州縣學取以爲法書院始於唐李寬在元和中宋初石鼓嶽麓白鹿洞應天府爲四大書院明以來天下設之

國朝嘉慶閒儀徵太僕勅精舍於西湖以詁經在粵復勅學

海堂近來鄂有經心蜀有尊經粵有廣雅湘有校經堂江蘇有南菁有學古堂制度一仿詁經爲之學校敝而後有書院書院又成具文而後有精舍今奉

明詔省州縣均建學堂分上中下三等仍如精舍之制亦卽郡縣學之舊制也居是官者宋時令中書采訪有經術行誼者教授又選京朝官有學行者堂除其官可謂鄭重後歸銓選以舉人歲貢揆充已失本義近復以輸金多者得之宜乎爲人所輕也雖然亦視其人之所自待何如耳沈孔珍官湯溪以正誼折縣令而縣令信服錢警石官海甯三十年士子奉之如父兄如二先生之學行亦何愧乎古人荆溪大好山水士民樸而愿以君爲之師立身行己皎然自拔乎流俗感

孚以意氣啟迪以間學孰有不信從者庶幾復古人建學設
官之遺意將於君焉望之矣

雷雲借月龕填詞圖題詞

吾州乾嘉之閒才人輩出茗柯導其先路止庵揚其清芬趨
盛軌於唐音訂中聲於宋調意內言外浚長之雅故文微義
著春秋之通例淫哇既屏厥體遂尊正宗之稱薄海無閒百
年以來遺緒欲墜劉子語石生長毘陵循先賢之矩矱被新
製於絃管江山助我敢辭汗漫之游文字累人太有怨誹之
語一日出雷雲借月龕填詞圖屬爲題句斯境也舊雨新姓
涼飈四起淨碧如洗嬌紅未薦呼之欲出雲眞可雷喝使倒
行月何難借既無心兮出岫亦對影而舉杯變蒼狗於彈指

幻境自生招銀蟾而墮懷涼痕欲活清景未失閒情轉深昏
黃庭院倚花影而吹笙新綠簾櫳炷鑪香而按譜固已旗亭
賭唱井水能歌繼軌張周無殊前喆荃孫蠅鑽貽誚蜉蝣徒
勞讀君之詞想君之所居安得晤君於疏簾清簟之旁坐我
於酒榼棋枰之側捉枝代麈埽葉煮茶相與發浩歌騰新唱
深情一往此樂千秋嗟乎君原詞客不少春江回首之思我
亦恨人那無煙柳斷腸之句勉爲隍隍兼綴小詞

徵采聽雲僊館詩文集啟

昔敬禮定子建之文劉沔輯東坡之作摩挲易軸懼蝕於風
霜鎔鑄性情無閒於新故古風足尚良友且然而況燕一瓣
之香皈依梵殿立三尺之雪久侍程門者乎秋史先生識冠

百代言成一家命居磨蝎之宮爪印飛鴻之潛屈原放逐乃
賦離騷馬遷幽憤退論書策故其爲文也濳啖趙之經心振
淵雲之儷藻發韓柳之精思軼徐庾之俳體冥心象外而落
筆已超千古局跡區中而羅胸能括九有而況半生道長萬
里飢驅嶽瀆助其精靈煙虹資以光氣哀樂之異宜古今之
感喟莫不於是發之今者寶墨猶溼哲人長萎山邱華屋慟
哭夫羔鼻金薤琳琅未編去李漢搜茂陵之草葉牛付寒蟬
收昌谷之錦囊迴非全豹過此以往而草元奇字盡覆鄰童
之瓠仲錄詞賦不入昭明之選非先生之不幸亦吾黨之重
羞也茲輯成儷文六卷詩三卷詞一卷擬書之藜棗藏之名
山至於枚皋禱祝之辭牛山制舉之體賓王作奏落紙千言

齡石會函吐文萬牒均已俟諸異日析爲外篇惟是卷帙
既富資用獨繁雖綴白之有心思殺青之無自斲喪盛舉爰
和我儕嗚呼執丹漆以西行音塵宛在侍絃歌於北面警欬
猶新庶幾撰香溪之集志行近仿夫高枏輟昆陵之編風義
遠紹夫梁肅

范季遠仕隱後圖記

武昌范月槎先生朗抱觀暉逸情雲止昌黎正學爲國子之
先生長慶清才授南州之司馬嘗作仕隱圖以見志同時名
流題詠殆徧固已耽吟蘿薜澹視簪綬矣余承遠觀察鉉
仕江南又將十稔復作仕隱後圖屬題筌蹄竊以爲樂以印
綬付以城社有功於國遺愛在民是之謂仕隱若湖山松雪

文吏無心於世自金其政是之謂隱之出者出處跡跡
亦異比而同之何哉昔嘗讀晉王康琚詩云小隱隱衡麓大
隱隱朝市至哉其言乎夫康琚所云者大抵族姓雖舊帷幄
之職未預官非黃散鈞衡之柄莫屬沈沈玉署偃蹇金門已
耳豈如今者魚魚逐隊麋麋登場稱衡之社常懷吾義之檄
未捧名不挂於朝籍粟不食夫太倉陳書慷慨上不見答於
台司攬轡澄清中不見信於僚友指揮曹司則或唯而或否
諧誠士庶亦將信而將疑沈龍泉於濁水誰是風胡困驥足
於鹽車罕逢伯樂所以詩吟槃澗情寄耕桑煙霞四壁宗少
文臥游之圖書畫一船米襄陽好古之癖莊周齊物世外道
遙郭璞游仙神兮寥廓則不謂之位不可不謂之隱亦不可

也然而天閃狼星海吹鱷浪時方多難世正需才一旦登君
於薦牘畀君以重任羽儀王國折衝樽俎爲

申朝嶽望所歸頌先德詒謀之善將以隱始而以仕終正
孫之所深冀也使仕未信我長抱魯連東海之心充隱何妨
君不忘稚圭北山之誦

順德李夫子六艷壽序

皇帝御宇之十有九年奎璧騰芒儀璘啟曜備中和之元氣
應名世之昌期是歲順天學政

南書房行走禮部右侍郎

順德夫子年六十矣襟裾文學紳笏丈夫莫不鞠肱騰觴續
擊致語門下士繆荃孫等執爵而進留自古曼壽斟元之世

必生延福建福之臣亭陰壚陽黼黻紀仰照難於宋匠極
光榮於國者而況經神學海貫串九流義府儒宗舉牢百民
荷

天之寵鳳翮播其輝華戴斗之稱龍門高其聲譽如夫子者
真可謂彰德事之更著聲聞之壽者矣仰惟夫子榮廣捷敏
鄭君通深負棟樑臨沒之才勵旭厯銳銀之志嘗謂秦坑既
灰孔壁斯振萌蘖於西京之始恢張於東漢之季唐宗南派
而家法淆矣宋尚理境而寔學荒矣夫子通變假借言之有
物典章制度集夫大成遠則紹賈服荀蔡之傳近則定注疏
孔張之緒是夫子之經學庚言未已乙部尤精夫子以爲四
史以降視若弁髦三唐而還棄同糠粃者非通儒也溯契塔

特建國之初及朱里眞磨兵之始騰格里之雅天降神人亦
集乃之路地窮兵力下逮勝朝尤多野史或以語防觸諱遂
閉箱笥或以傳乏通人終蕪塵塏闕幽挾滯補闕訂訛年經
月緯松紋之紙常緇雪纂露鈔瓠盧之本亦出是夫子之史
學

國朝四庫所集七閣所儲儼羽陵天祿之珍駕文德華林而
上夫子名山剔寶海舶搜奇螺損千丸羊禿萬穎劉略阮錄
訂其存佚之代晁志陳書證其完缺之數丹函壓地彩帙熙
天匯典籍之鉅觀極編摩之能事將以上之

中祕播於藝林續宛委之別藏啟琅嬛之異境是夫子目錄
之學而且憲臚同異廣拾叢殘坐擁縑緗行提鉛槧條篇撮

旨略依欽向之前規象形諧聲旁通任尹之雜技往往數行
有缺吳越傳鈔一字未安寢饋失度後生末學陶鑄良多是
夫子校勘之學大銀之國崛起北方王宋之所未詳陳薛之
所不道祕史晚出頗具梗概世次懸邈稽字端察見之前事
蹟翔寔勝脫卜赤顏之記夫子廣搜中文旁采西學一譯再
譯合音對音天興爲舍不罕之紀年愛曼爲乃蠻歹之異字
辭靈歌水卽唐書之仙娥阿勒台山此地志之杭愛兀籠格
赤證赤心二字爲分書曲雕阿闐知庫鐵一山非兩地尋源
等於蛛絲馬跡校錯類於風葉凡塵爲祕史注十六卷元時
置域西北最遠地理埒志挂漏良多大典存圖方位亦失夫
子補夫舊牘證以今名建都於紅城耀武於白霄虎圖卽闕

桑之別體龍居亦臚胸之同音別失八里之地本北庭之故
封旺兀察都之官乃興和之舊境據蔑里思之巖疆已鄰冀
海建阿母河之行省寔控鐵門一地有三字四字之殊一名
有蕃語華語之別莫不整齊與說騎驛各書絳疊繡壤恍披
站尺而周行左圖右書如坐舌人而問訊爲元史地名考十
卷西游錄注二卷富貴城西珍珠河北和林故壤三水所環
苾伽可汗之居尚餘遺址怯蹇又寒之澤特起新宮金蓮瓊
島閭闔象夫天垣蘆淀草塢松石韻於沙岸自昔紀載頗爲
渺荒近則茫茫瀚海屹立特勤之鉅碑磊磊殘垣尚賸李唐
之壞甃銅駝卧雪石馬嘶風以及至順去思之文總管收糧
之碣碧苔剝蝕野火未燒翠墨陸離遺文可讀夫子證以突

厥之傳耶律之詩當此濟爾瑪台之源在今賽因諾顏之部
此則張何考索不知城郭之猶存程魏鋪張不如碑刻之足
據爲和林金石錄一卷在昔金匱之篇載於班志青囊之法
受之郭公亥首巳首分八卦而辨陰陽甲木乙木定三元以
分休咎惟筠松之傳述爲振孫所錄存夫子發其大綱通夫
奧義論山川之向背形勢各成測沙水之性情理氣自足固
儒宗之緒餘亦非術者所企及也爲疑龍撼龍經注各一卷
是皆通天人之奧合古今之轍混華寔之辨鑑得失之林禮
堂簡策萬流仰爲山淵芸閣篇章六際歸其縱橫偉哉絕業
莫與京已今夫官職與聲名並重詞章與經術殊途才如賈
董位不躋於蕭張文似班揚學或慚於服鄭夫子盛名兼擅

碩福兩隆爲當代之哲匠極文人之殊遇甫登上第旋值
內廷東觀紬書南齋珥筆陸贄未離翰苑備極恩榮高郢進
拜秩宗允孚譽望職司禮闈編石渠之論議儀掌睿臺贊
熙朝之典故而且輶軒半天下衣鉢傳五葉典試乘吳越巴
蜀之輶督學蒞畿輔豫章之省方聞之士咸入網羅大雅不
羣投如鉞芥雷煥歸而劍氣斂伯樂過而冀野空心說誠服
徧寰區矣昔夫子在學士之任以養親而歸高堂九黜載賡
華黍之篇養志十年克盡萊衣之樂闢園種竹築室栽花佩
徽相莊芝蘭特秀況復迴翔講席獎掖後賢出則衣被無垠
處則著述不倦稽法追鄭文司惠分隸亦韓勅史晨異域寶
若球琳尺楮視同金璧兼及姑布子卿之術復習黃帝內經

之書綵圓所闢博太真然仲任所謂鴻儒金玉未當之詢
無媿色而微窺意旨常若有不釋然於懷者則以非族逼處
耶教橫流誘我編氓侵我屬國撓我政體奪我利權況境宇
之毘連顧扞禦之弗備雖薩寶符之官已見通典而赤摩尼
之教終屬異端夫子懷通權達變之才抱長駕遠馭之略營
平上策常懷遏敵之心驟騎忘家誓有滅胡之志防致取則
分置畫界畱後圖則測海梯山先爲自強之謀庶免議和之
辱往者西葵吹日東鯨跳波夫子秦

朝命備邊陲轉饒糴衛鄉里天狼十丈風鶴四驚值桂撫之
燿師棄雄關而委敵乃掃蹶張之士卒重起太樹之將軍白
羽揮風朱旗耀日遂乃擲銳應手犀角之渠仆地投炬灌尾

雉膏之光燭天克敵復仇武功第一於是金城息鼓玉敦尋
盟人弟見奔走禦侮將帥之力居多而不知發蹤指示帷幄
之功獨偉非夫子久籌戰略身悉敵情深權彼我強弱之形
兼策戰士利鈍之實何以能成師一出程效若此也荃孫等
久依函丈備荷陶鈞忝隨編錄之班幸預校讐之末識稽古
論思之旨道在則尊窺經文緯武之心德成者上登堂祝嘏
吮筆摛詞義不取諛言皆徵實此日金屏九疊聊佐錦筵介
壽之觴他年銀管千枝更記

紫閣調元之績

祭湯母呂恭人文

左班懿範鍾邦遺型素帷戢影彤管流馨春寒梧捲餌失松

蒼式昭舊德以妥先靈猗與恭人間里矜式結璘誕華璫瑜
毓德望族河東清游冀北宛宛其容怡怡者色星占弟四月
映無雙敲詩秋徑吮墨晨窗麗詞椒菊雅詠蘭茱萬錢玉笈
七寶銀缸學供酒漿早薄紉綺夜杼織鴛晨廚烹鯉孝養一
心勤劬十指誠懷大家頌堪中壘中山作嬪淑譽益新嘉耦
曰妃相敬如賓禮隆僅栗詩詠湖蘋室隨伯姊程守先民榻
上琴書校中彝鼎闢韻擘箋繙書賄茗音叶笙簧語消畦町
鳥喚畫眉鑪煎蒙頂萊英夫子素筆六州繞朝贈策王粲登
樓千里百里山郵水郵詩吟徐淑書報高柔羞吹展屢甘奉
箕帚上侍白頭下撫黃口釧脫金纏杯斟玉扣宴集嘉賓米
炊巧婦夫子筮仕作宦武康秋江桂楫夜雨筍蔣一燈刀尺

百室酒漿譽畱慈惠政佐循良泊任縉雲崎嶇荒谷早憚勞
薪敢辭轉轂瞻念松楸就荒杞菊治我餽糧復我邦族永嘉
山水再作清游魚軒古驛鵠舫芳洲織催蛩砌旦戒雞籌榮
居華廡化洽歌謳南澗栽桑西堂種柳游山謝公種秫淵叟
視夜求衣勸農戴斗共方寸心如左右手纔歌樂歲旋迫驕
陽龜田塵赤蛤稻波黃鬼飛旱魃咒誦木郎其雨其雨誠格
穹蒼爰念慈幃重返鄉邑天上禮明局中劫急風鶴驚呼石
鯨暗吸巢燕難安屋烏奚集提攜細弱閱厯艱難蓉湖波暖
岱嶽雲寒十步九顧半菽一餐幾經顛沛終慶團樂相我夫
子言返初服翦韭炊梁牽蘿補屋舉案諧鴻挽車卽鹿兵火
餘生林泉清福有田十頃有菜一畦雪中鋤藥霜下烹葵平

安種竹脰脰聽棋陸通小隱阮肇仙姿有子有子邦之司彥
秋窟桂香春園杏宴日下荀鳴雲司禰薦繞膝孫曾玉雪豔
美忽歌鵲寡咸悲鵬來黔寒衾正杞哭城頽荒荒白日肅肅
黃埃杏花示識封翁臨沒時謂太恭人曰勿悲明年杏
花時來返汝也太恭人果以二月卒蒿里

銜哀酒失延齡方難駐景碧落偕行青輶共騁屋迴呼皋筵
虛祝哽龍璈咽聲鶴駕淒影嗚呼哀哉昔年上壽美稱兕觥
今茲真冷風寒雁藥崦迴日薄樹靜風驚璇漏激箭瑤樞掩
精嗚呼哀哉道韞清才劉綱仙侶逝水銜悲乘雲遐舉芳躅
在茲徽音具舉神其歆諸椒漿桂醕嗚呼哀哉